

佛藏經卷第一

篤五

姚秦三藏法師鳩摩羅什譯

諸法實相品第一

如是我聞一時佛住王舍城耆闍崛山中與大比丘僧俱皆是衆所知識及無邊大菩薩摩訶薩衆無量無數爾時舍利弗從三昧起行詣佛所偏袒右肩頭面作禮白佛言希有世尊如來所說一切諸法無生無滅無相無爲今人信解佛告舍利弗汝見何利歎言希有如來所說一切諸法無生無滅無相無爲

篤五

今人信解舍利弗白佛言世尊我在靜處每作是念世尊乃於無名相法以名相說無語言法以語言說思惟是事生希有心佛告舍利弗如是如是是事希有第一希有謂是諸佛阿耨多羅三藐三菩提舍利弗如巧畫師畫於虛空現種種色相於意云何是畫師者爲希有不希有世尊舍利弗如來所得阿耨多羅三藐三菩提說一切法無生無滅無相無爲今人信解倍爲希有所以者何無名相法無念無得亦無有修不可思議非心所依

無有戲論非是戲論所可依止無覺無觀無有所攝不在於心非得所得無此無彼無有分別無動無靜本來自空不可念不可出一切世間所不能信如是無名相法以名相說如是舍利弗一切諸法無生無滅無相無爲今人信解倍爲希有舍利弗譬如有人嚼咽須彌能令消盡飛行虛空不以爲患於意云何爲希有不希有世尊舍利弗諸佛所說一切諸法無生無滅無相無爲今人信解倍爲希有舍利弗譬如火城縱廣深淺谷一由旬

四門出燄人負乾草於中而過猛風吹燄燒博其身是人能令火不燒草及不燒身於中得出如本不異於意云何爲希有不希有世尊舍利弗如來所說一切諸法無生無滅無相無爲今人信解倍爲希有舍利弗譬如有人以石爲棧馬五從海此岸渡至彼岸於意云何爲希有不希有世尊舍利弗如來所說一切諸法無生無滅無相無爲今人信解倍爲希有舍利弗譬如有人負四天下及諸須彌山河草木以蚊脚爲梯墜至於梵天於意云何

為希有不希有世尊舍利弗如來所說一切諸法無生無滅無相無為令人信解倍為希有舍利弗譬如藕絲懸須彌山在於虛空於意云何為希有不希有世尊舍利弗如來所說一切諸法無生無滅無相無為令人信解倍為希有舍利弗譬如劫盡大火燒時人以一唾能滅此火又以一吹還成世界及諸天宮於意云何為希有不希有世尊舍利弗如來所說一切諸法無生無滅無相無為令人信解倍為希有舍利弗恒河廣大為無量不

如是世尊舍利弗四天下中普雨大雨滴如恒河有人以手承此雨滴無所遺落於意云何為希有不希有世尊舍利弗如來所說一切諸法無生無滅無相無為令人信解倍為希有舍利弗須彌山王為高大不高大世尊舍利弗四天下中普雨大石皆如須彌有人以手承接此石無有遺落如芥子者於意云何為希有不希有世尊舍利弗如來所說一切諸法無生無滅無相無為令人信解倍為希有舍利弗譬如有人以一切衆生置左手

中右手接舉三千世界山河草木皆能令是  
一切衆生同心喜樂其意不異於意云何爲  
希有不希有世尊舍利弗如來所說一切諸  
法無生無滅無相無爲令人信解倍爲希有  
舍利弗如來所說諸法無性空無所有一切  
世間所難信解何以故舍利弗是法無相離  
諸相無念離諸念無取無捨無戲論無惱熱  
非此岸非彼岸非陸地非癡非明以無量智  
乃可得解非以思量所能得知無行無相無  
有惱熱無念過諸念無心過諸心無向無背

無縛無解無妄無妄法無癡無癡法無有疑  
網無名無言無說無不說無盡無不盡無行  
無行相無道無道果無離過諸離無思惟無  
親疎不取不捨無得不可得除諸諦除貪恚  
癡非實非虛妄非常非無常非明非不明非  
闇非照不在心無有性性本空能降伏魔降  
伏煩惱降伏五陰降伏十二入降伏十八界  
降伏說有五陰者降伏說有十二入者降伏  
說有十八界相者降伏說有衆生者說有人  
者說有壽者說有命者說有有者說有無者

降伏一切諸邪行者舍利弗我此聖法皆能  
降伏一切貪著乃至說有法者不信樂諸法  
如實相者逆佛法者所以者何舍利弗若有  
衆生說我者說人者說衆生者說斷滅者說  
常者說有者說無者說法者說假名者說邊  
者皆違逆佛與佛共諍舍利弗乃至於法少  
計得者皆與佛諍與佛諍者皆入邪道非我  
弟子若非我弟子即與涅槃共諍與佛共諍  
與法共諍與僧共諍舍利弗如是見人我則  
不聽出家受戒舍利弗如是見人我則不聽

馬五

四

受一飲水以自供養舍利弗若人除捨如是不善貪著事者於我法中出家求道不念涅槃不以涅槃為念不貪涅槃於畢竟空法不驚不畏是人尚為斷諸法故勤行精進何況如是不善貪著謂著我著衆生著人著法是人為斷諸貪著故但勤修習無相三昧於無相三昧亦不取相是人通達一切諸相皆是一相所謂無相舍利弗是則名為於聖法中柔順法忍得是柔順法忍乃名是我弟子能消供養不空受身所以者何舍利弗我是真

實相法不可入不可取不可捨不可貪不可  
 說斷言說道無歡無喜斷貪喜心非眾緣合  
 離眾因緣無道斷道至於無道斷諸語言論  
 議音聲無形無色無取無著無用無實無妄  
 無闇無明無壞無諍無合無散無動無念無  
 有分別不可得示非垢非淨非名非相非心  
 數法非心所解我此法中無男無女無天無  
 龍無夜叉無乾闥婆無鳩槃荼無毗舍闍無  
 斷無常無我無眾生無人無來無去無出無  
 入無戒無犯無淨無垢無有三昧無定無定

根無禪無禪根無知無見無貪無諍無道無  
 道果無慧無慧根無明無非明無解脫無非  
 解脫無果無得果無力無非力無所畏無無  
 所畏無念無念根無坐無行無有威儀無此  
 無彼無憶想分別無菩提無菩提分無智無  
 非智無地無水無火無風無罪無福無法無  
 非法無苦無樂拔諸一切戲論根本一切永  
 離今而無相舍利弗舉要言之我法悉破一  
 切諸念一切諸見一切諸結諸增上慢不念  
 一切諸所憶念除斷一切種種語言我是法

中無常無無常無苦無樂無垢無淨無斷無常無我無衆生無人無壽者無命者無生無滅何以故舍利弗如來於法都無所得有所滅故名爲涅槃亦不見有得涅槃者舍利弗佛亦不念涅槃不以涅槃爲念亦不貪著涅槃是故當知是爲第一奇特希有所謂如來說一切法無生無滅無相無爲令人信解倍爲希有

### 念佛品第二

爾時舍利弗白佛言世尊於此法中云何爲

惡知識云何爲善知識佛告舍利弗若有比丘教餘比丘比丘汝當念佛念法念僧念戒念施念天比丘汝當觀身取是身相所謂不淨當觀一切諸有爲法皆悉無常觀一切法空無有我比丘汝當以所緣相繫心緣中專念空相當樂善法當取不善法相取不善法相已爲令斷故觀念修習謂爲斷貪欲觀不淨相爲斷瞋恚觀慈心相爲斷愚癡觀因緣法常念淨戒深取空相勤行精進爲得四禪專心求道觀不善法皆是衰惱觀於善法最

篇五

六

是安隱一心修道分別諦觀善不善法諦取相已一心思惟觀涅槃安隱寂滅唯愛涅槃畢竟清淨如是教者名為邪教謂是正教而是邪教舍利弗如是教者名惡知識是人名為誹詩於我助於外道亦為他人說邪道法舍利弗如是惡人我乃不聽受一飲水以自供養我說教者不說受者舍利弗於我法中多有如是增上慢教舍利弗若受教者受戒五歲不能悉捨如是所教於是教中勤心精進自有得無所有比丘不往請問我說此人

雖有五歲猶名邪見雜外道法順行魔事舍利弗若有比丘受是教已聞空無所得法即自覺知我先受者皆是邪見於空無所得法無疑無悔深入通達不依一切我見人見舍利弗我說此人名為清淨梵行舍利弗若有比丘成就如是無所得忍七雖現未得無餘涅槃我記是人彌勒佛時當在初會時彌勒佛歡喜三唱是人能於釋迦牟尼佛法中成就無所得忍舍利弗若在家出家成就此忍我說是人必得涅槃舍利弗若有人受如是教

已聞空無所得法即時驚畏是人可愍無有  
救者無有依者直趣地獄何以故舍利弗於  
佛教中驚疑畏者是人則為具足惡道所以  
者何我常自說有所得者是惡道分何以故  
舍利弗佛所得法無有差別是與非是若可  
差別是有所得舍利弗人寧成就五逆重罪  
不成就我見衆生見人見壽見命見陰入界  
見貪著持戒著持戒見貪著三昧著三昧見  
依於佛相得於法相於僧斷事成就身見何  
以故於佛法中成就身見不在僧數舍利弗

佛弟子衆心無分別舍利弗佛弟子衆無不  
善者無破戒者無破見者無破威儀者舍利  
弗何等為惡不善佛告舍利弗於佛法中不  
在僧數名惡不善謂心心數法與諸緣合無  
真實事但作分別以分別故計有所得是人  
乃至所有說言心心相續乃至善不善法於  
聖法中名惡不善何以故舍利弗所有樂處  
中必有苦如來法者滅是苦樂舍利弗如來  
所得是中無欲亦無非欲無樂無苦無思無  
想無修乃至亦無空相何以故舍利弗若計

空相即是我相衆生相者是常相者是斷相者何以故舍利弗隨所有想則生諸相是皆隨邪舍利弗空名無念是名爲空空念亦空是名爲空舍利弗空中無善無惡乃至亦無空相是故名空空舍利弗諸有爲法可知可解空非可知亦非可解非可思量是故名空舍利弗空相非念得何以故空無相故是故名空舍利弗何故說行空行佛告舍利弗不念一切諸相乃至空相亦復不念是名空行舍利弗相名乃至心有所念即名爲想無所念

者乃名無想離諸想故名爲無想隨所取想皆是邪見何以故舍利弗於聖法中計得寂滅皆墮邪見何況言說何況說者如是空法以何可說舍利弗諸佛何故說諸語言皆名爲邪佛告舍利弗不能通達一切法者是則皆爲言說所覆是故如來知諸語言皆爲是邪乃至少有語言不得其實舍利弗諸佛阿耨多羅三藐三菩提皆是無相無念何以故如來於法不得體性亦不得念舍利弗言如來何故說有念處佛告舍利弗經說若人得

四念處是人能得諸法體性能得自身得我  
得人無有是處示法別相空故說四念處四  
念處性無性無處無念無說無有貪著念性  
尚無何況念處是故如來說名念處舍利弗  
諸法若有決定體性如析毛髮百分一者是  
則諸佛不出於世亦終不說諸法性空舍利  
弗諸法實空無性一相所謂無相如來悉見  
如來以是說有念處舍利弗念處名爲無處  
念無非處無念無念業無相無分別無意無  
意業無思無思業無法無法想皆無合散是

第五

九

故賢聖名爲無分別者是名念處如來以是  
說有念處隨順念無所有故名爲念處隨順  
念佛名爲念處舍利弗云何名爲念佛佛告  
舍利弗見無所有名爲念佛舍利弗諸佛無  
量不可思議不可稱量以是義故見無所有  
名爲念佛實名無分別諸佛無分別以是故  
言念無分別即是念佛復次見諸法實相名  
爲見佛何等名爲諸法實相所謂諸法畢竟  
空無所有以是畢竟空無所有法念佛復次  
如是法中乃至小念尚不可得是名念佛舍

利弗是名念佛法斷語言道過出諸念不可得念是名念佛舍利弗一切諸念皆寂滅相隨順是法此則名為修習念佛不可以色念佛何以故念色取相貪味為識無形無色無緣無性是名念佛是故當知無有分別無取無捨是真念佛

念法品第三

爾時舍利弗白佛言世尊云何為人亦說是法為惡知識世尊云何為人亦說是法為善知識佛告舍利弗若有比丘教他比丘比丘

汝今當知念佛事空念所緣處是不應念汝所念空念亦復空是無性空能斷色相能斷取相是人爾時不得無相何況於念是人爾時都無所有寂滅無性不集諸相滅一切法是則名為修習念佛念佛名為破善不善一切覺觀無覺無觀寂然無相名為念佛何以故不應以覺觀憶念諸佛無覺無觀名為清淨念佛於此念中乃至無有微細心心念業況身口業又念佛者離諸相諸相不在心無分別無名字無障礙無欲無不起覺觀何

馬五

十

以故舍利弗隨所念起一切諸相皆是邪見  
舍利弗隨無所有無覺無觀無生無滅通達  
是者名為念佛如是念中無貪無著無逆無  
順無名無相舍利弗無想無語乃名念佛是  
中乃無微細小念何況麤身口意業無身口  
意業處無取無攝無諍無訟無念無分別空  
寂無性滅諸覺觀是名念佛舍利弗若人成  
就如是念者欲轉四天下地隨意能轉亦能  
降伏百千億魔況蔽無明從虛誑緣起無決  
定相是法如是無相無戲論無生無滅不可

說不可分別無闇無明魔若魔民所不能測  
但以世俗言說有所教化而作是言汝念佛  
時莫取小相莫生戲論莫有分別何以故是  
法皆空無有體性不可念一相所謂無相是  
名真實念佛所謂無生無滅無相何以故如  
來不名為色不名為相不名為念不名分別  
不逆不順不取不捨非定非慧非明非無明  
如來不可說不可思議無相汝今莫樂取相  
莫樂戲論佛於諸法無執無著不見有法可  
執可著是人於佛猶尚不得何況於念舍利

馬五

弗如是教者名善知識第一義中無有決定是善知識非惡知識復次舍利弗若有比丘教餘比丘比丘汝當分別觀察諸法亦復莫念法相是比丘如是修習心無繫著則能通達諸法一相所謂無相是人猶尚不生法相況我人相舍利弗於意云何念法相者是人能滅一切法不不也世尊舍利弗如樹無根能有枝葉華實不不也世尊如是舍利弗若人不得諸法根本是人能生諸法相不不也世尊舍利弗若人不得不念法相是人能滅

一切法不不也世尊是人不得於法不得法相不得於滅亦不分別無生無滅是人爾時不生不滅不名得涅槃者亦復不名先得涅槃舍利弗如是教者名善知識第一義中無善知識無惡知識舍利弗若人成就如是相者世間希有得不顛倒真實見故名爲正見復次舍利弗正見者名爲正作正行正道正解無有顛倒如實而見是故如來說爲正見舍利弗若有衆生無有顛倒如實觀者則有正見若生我相人相衆生相者當知是人皆

是邪行舍利弗佛及弟子不說有我不說有人不說衆生不說壽不說命不說斷常是故佛及弟子名為正見何以故正觀不顛倒故舍利弗一切凡夫於此事中無能入者何以故一切凡夫都無正見但有隨順正見得柔順忍不能如實舍利弗是名正見邪見差別如實見故名為正見見世樂因增長財利是世間正見是皆欺誑不免生死舍利弗佛說世間正見是說懈怠下劣之法賢聖不作是念此是正見此是邪見所以者何一切諸見

昔從虛妄緣起舍利弗若作是念此是正見是人即是邪見舍利弗於聖法中披斷一切諸見根本悉斷一切諸言語道如虛空中手無觸礙諸沙門法皆應如是

#### 念僧品第四

舍利弗白佛言世尊何等為聖衆佛告舍利弗若有人能信解通達一切諸法無生無滅無起無相成就是忍尚不得我況得須陀洹斯陀含阿那含阿羅漢況復得法況得男女何況得道況得如是等事是名聖衆是亦不

得復次舍利弗衆生少能信解無生無滅無相法者若能信解無生無滅無相法者心無顛倒共相知解以法和合不受後有知諸世間但從虛妄緣起是人則更不住是身以是因緣說名聖衆是人於是語言亦復不得謂

馬五

十三

得是故當知斷諸語言名爲聖衆舍利弗或有人言於此法中無有言說無有定者何名爲僧舍利弗我於此法中有如是答衆僧名爲示如實事此事決定亦不可得俱同一學一忍一味是事亦以世俗語故說非第一義第一義中無有定實名爲僧法常不壞者聖人若說言有是法是即爲汙所以者何若人作是分別是男是女是天是龍是夜又是乾闥婆是鳩槃荼是法非法作是分別已得種種事得種種事故作是言是坐是卧是行

是住聖人得諸法實相故亦不分別是男是女是天是龍乃至是法是非法不分別故不得種種法不得種種法者能作是說是坐是卧是行是住不不也世尊舍利弗若人言是男是女是天是龍乃至是法是非法是人所說非虛妄耶虛妄世尊舍利弗若不入是虛妄者名為聖眾不顛倒故名為聖眾舍利弗所有不善所有可知所有可得如是一切諸不善法皆以名相為本此賢聖法中斷諸名相又不念名相不得名相云何當言是聖是

眾斷諸名相名為聖眾若有法處可破可斷賢聖法中無名無相無有語言斷諸語言無有合散若言無僧則破聖眾是亦不得所謂名相虛妄想故著種種邪見因是邪見更受後身貪著諸見則五陰生舍利弗五陰皆是十四虛妄貪著是名惡道是名邪道賢聖眾者無有此事但知虛妄緣故起於三界知是事故名為聖眾舍利弗凡所有見於聖眾中皆不可得謂我見眾生見壽命見人見男見女見天見地獄見畜生見餓鬼見陰入界見貝聲

見鼓聲見地聲見水火風聲見持戒聲見毀  
戒聲見正道聲見邪道聲見垢聲淨聲禪定  
三昧八聖道聲須陀洹果斯陀舍果阿那舍  
果阿羅漢果聲見解脫聲見得果聲見佛聲  
見法聲見僧聲見滅聲見涅槃聲見舍利弗  
是名虛妄音聲等見賢聖衆者於第一義不  
得是見通達種種音聲一相所謂無相無違  
無諍成就不顛倒法忍故名爲聖衆舍利弗  
是不顛倒法忍即是無相無相故無取無捨  
無逆無順無生無滅是中自然歸滅無修無

壞無起無得不分別此彼故心常捨離所以  
者何於是忍中無此岸無彼岸無分別無非  
分別通達無相成就是忍名爲聖衆破和合  
故名爲聖衆舍利弗我餘經說若人見法是  
爲見我如來非法亦非非法何以故調達愚  
人及諸外道皆以色身見佛舍利弗如來不  
應以色身見亦復不應以音聲見舍利弗若  
人以色身見佛是去佛遠所以者何佛不名  
色不名爲見名爲見佛舍利弗若人能見諸  
法無相無名無觸無憶無念無生無滅無有

萬五

十五

戲論不念一切法不念涅槃不以涅槃爲念  
不貪涅槃信解諸法皆是一相所謂無相舍  
利弗是名真見佛謂一切法無求無戲論無  
生於此事中亦不念不分別是名見佛若有  
諸人於此法中無憶想分於無取無捨無貪  
無違無相無相業不貪言說知法假名皆無  
所有斷語言道無有差別亦無戲論是名無  
生無相行者於世界中名爲聖衆舍利弗見  
何法故名爲見佛所謂無相無分別無戲論  
不受一切法者若以空門若寂滅門若離門

不念見不得見是事亦不得所謂名字是處  
亦不得所謂涅槃何以故舍利弗我尚不念  
涅槃云何當說汝等當念涅槃當得涅槃舍  
利弗若人得涅槃者是不隨如來出家隨  
六師出家舍利弗當知是人爲是法賊入我  
法中當知是人汙辱我法當知是人爲是大  
賊如大城邑中有大賊所以者何如是癡人  
尚不得涅槃何況我人舍利弗如是癡人我  
以手遮非我弟子不入衆數我非彼師舍利  
弗若知諸法無生無滅無念無相得是法忍

者尚不得涅槃何況我人舍利弗佛亦說言  
如是人者名為見法能見是事名為見佛舍  
利弗云何名為如來佛告舍利弗一切法如  
不異不壞是名如來若人於是法中無有疑  
悔是名聖眾舍利弗過去世中有一癡人不  
識獼猴入一大林見獼猴群叢聚一處是人  
曾聞有忉利天便謂為是忉利諸天即出樹  
林還本聚落多人眾中作如是言汝等曾見  
忉利天不眾人答言未曾見也即時語言我  
已得見汝欲見不皆言欲見即將大眾詣彼

林中示獼猴群汝等觀此忉利諸天眾人皆  
言非忉利天此是獼猴樂住林中汝癡倒故  
不識獼猴又亦不識忉利諸天舍利弗是人  
空將大眾詣彼林中如是舍利弗於未來世  
當有比丘至白衣家作如是言汝欲見佛聖  
眾聽佛法不中有白衣信佛法者皆言欲見  
聽受佛法舍利弗中有白衣貪樂語言入於  
塔寺有諸比丘好於言說能通諸經依止語  
言樂於文飾是諸沙門隨順為說謂是真道  
但充眾數如牧牛人俱樂讀經不入真際但

悅人意貴於名利善巧世事不淨說法但能巧語行世間道無有威德破涅槃因捨聖默然不樂禪定晝夜常好談論諍訟卧厚被褥尚無一念隨順禪定何況能得成沙門果是人睡眠常與俗心相應初夜後夜不修順忍樂於下法是人亦多得供養衣服飲食何以故是人常爲惡魔所攝樂淺近語於第一義不能勤學不能誦持第一深經聞則驚畏捨於淳濃而取糟粕有諸凡夫見得利養生會著心作是念言我等亦當習是言論舍利弗

第五

十七

是人捨於無上法寶墮在邪見是沙門旃陀羅有諸白衣往詣其所如此惡人而爲說法以利養故稱讚於佛及法與僧但求活命爲財奴僕貪重衣食讚已所樂若行布施得生天上於佛法中施爲下法讚以爲最而作是言大施因緣得生天上不知語言不解義趣但知初入淺近下法貪著我人捨第一義舍利弗如是說法或時有人生信出家與諸惡人而共和合不能勤求第一深義有所得者說有我人壽者命者憶想分別無所有法於

阿毗曇修妬路中自爲議論或說斷常或說有作或說無作舍利弗我法爾時多外道法令諸衆生正見心壞如是舍利弗我清淨法以是因緣漸漸滅盡舍利弗我久在生死受諸苦惱所成菩提是諸惡人爾時毀壞舍利弗若有比丘不能捨是有所得見我見人見不解如來隨宜所說而言決定有我人法如是之人我則不聽受一飲水或時是人得聞空法信心清淨而不驚疑即便還應道引衆人入實相義便應出家受具足戒何以故舍

舍利弗若人不捨如是見者是名外道舍利弗我以此世俗因緣假說有我非第一義若有人言我亦復以世俗因緣而說有我是人若能通達無生無滅無相之法與我所說不<sub>馬五</sub>違者是我弟子舍利弗若有人言如來何故隨世因緣於無我法而說有我如來不應爲<sub>十八</sub>世間故作不實語又諸經中多說有我佛所說者不應虛也舍利弗應答是人佛說諸法皆空寂無主無性但是虛妄非第一義如來不以第一義故說有我人聖人言說無所貪

著無智慧人無與佛等亦無過者舍利弗如  
來智慧不可思議以是智慧知衆生心寧當  
有人與佛等者佛爲天龍大法之王不應難  
言佛說有人一切世間常共我諍我常不與  
世間共諍舍利弗說有我者甚可哀愍此中  
無法亦無有我多有衆生不解如來隨宜所  
說違逆法寶多隨惡趣舍利弗我知邪見而  
不爲邪見知邪見者即是正見舍利弗邪見  
終不變作正見見不知見舍利弗諸佛如來  
阿耨多羅三藐三菩提一切世間所難得信

我於諸天一切世間是最可信非不可信舍  
利弗我所說法爲至彼岸是中亦無至彼岸  
者我所說法爲盡諸行是中亦無盡諸行者  
我所說法爲寂滅故是中亦無有寂滅者我  
所說法爲滅度故是中亦無有滅度者我所  
說法爲解脫故是中亦無有解脫者我所說  
法爲諸智故是中亦無有諸智者我所說法  
爲淨垢故是中亦無有淨垢者舍利弗如來  
爲天說法亦無有天爲人說法亦無有人爲  
衆生說法亦無有衆生舍利弗如來說明及

第五

十九



佛藏經卷第二

篤六

姚秦三藏法師鳩摩羅什譯

淨戒品第五

佛告舍利弗破戒比丘有十憂惱箭難可堪忍比丘成就十憂惱箭則於佛法不得滋味

第六

憎說法者不樂親近何等為十舍利弗破戒比丘見僧和合不生喜心何以故和合布薩必驅我出是惡比丘自知有過常懷憂惱於持戒者瞋恨不喜舍利弗是名破戒比丘初憂惱箭必墮惡道復次舍利弗破戒比丘衆

所憎惡不欲親近如惡牛利角人所捨遠是惡比丘自知有過常懷疑憂惱舍利弗是名破戒比丘二憂惱箭必墮惡道復次舍利弗破戒比丘遙見比丘衆自知不同惡心捨離懷愧恥故不能入衆舍利弗是名破戒比丘三憂惱箭必墮惡道復次舍利弗破戒比丘毒惡心盛不可化喻猶尚無有外道戒法況於淨戒以其破戒因緣人不親近舍利弗是名破戒比丘四憂惱箭必墮惡道復次舍利弗破戒比丘以他財物自養其身我說此人

爲重擔者所以者何行者得者應受供養破戒比丘非是行者非是得者是故舍利弗破戒比丘當於百千萬億劫數割截身肉以償施主若生畜生身常負重所以者何如折一髮爲千億分破戒比丘尚不能消一分供養況能消他衣服飲食卧具醫藥舍利弗破戒比丘著聖法服猶尚不應入寺一步何況得受一飲之水乃至牀榻何以故舍利弗如是惡人於天人中是爲大賊一切世間皆應遠離舍利弗是敗壞人即是怨家如來悉聽一

切世間皆至我所破戒之人如來手遮非我弟子何況一日住我法中舍利弗譬如死人死蛇死狗最爲臭穢清淨諸天欲遊戲時不應得見若見則遠如是舍利弗破戒比丘如彼三尸臭穢不淨智者遠離不與同事布薩第六自恣舍利弗破戒比丘於我法中爲是不吉持戒比丘見此破戒即時遠離何以故若破戒比丘手所觸物及所受物於持戒者則爲毒惡舍利弗正使三尸臭穢滿地我能於中行四威儀不能與此破戒比丘須臾共住何

以故舍利弗是為沙門中卑陋下賤為沙門  
中朽壞弊惡為沙門中糝糠為沙門中垢為  
沙門中濁為沙門中汙為沙門中曲為沙門  
中麤為沙門中失聖道者如是等人於我法  
中出家求道而得重罪舍利弗如是之人於  
我法中為是逆賊為是法賊為是欺誑詐偽  
之人但求活命貪重衣食是則名為世樂奴  
僕舍利弗譬如黃門非男非女破戒比丘亦  
復如是不名在家不名出家命終之後直入  
地獄舍利弗譬如蝙蝠欲捕鳥時則入穴為

鼠欲捕鼠時則飛空為鳥而實無有鼠鳥之  
用其身臭穢但樂闇冥舍利弗破戒比丘亦  
復如是既不入於布薩自恣亦復不入王者  
使役不名白衣不名出家如燒尸殘木不復  
中用如是比丘無有戒品定品慧品解脫品  
解脫知見品第六但有具足破淨戒品不能出大  
微妙音聲戒聲定聲慧聲解脫聲解脫知見  
聲但出毀戒弊惡音聲與諸同惡俱出惡聲  
但論衣服飲食牀卧受取布施樹木華果為  
貴人使及論國土吉凶安危戲笑眾事諸不

善語常於日夜比丘如是身業不淨口業不淨意業不淨當墮地獄舍利弗是破戒比丘樂於闇冥如彼蝙蝠聞說正經以為憂惱所以者何如實說故世間之人不喜實說但樂順意如是比丘於說法者心不清淨重更為罪增益地獄舍利弗是名破戒比丘五憂惱箭必墮地獄復次舍利弗破戒比丘無有羞恥諸根散亂成就不淨身口意業不淨威儀所著衣服皆不如法好喜妄語不能護口心常馳騁淩於垢穢舍利弗如新瓦器盛以屎

屎臭爛膿血後去不淨著栴檀香復去栴檀如是瓦器有何等氣世尊是新瓦器先盛屎屎臭氣堅著唯有臭氣無栴檀香舍利弗人以清淨信等諸根出家學道遇惡知識而隨其教舍利弗何等為惡知識惡知識者常好調戲輕躁無羞言語散亂不攝諸根心不專一癡如白羊親近如是惡知識者失須陀洹果斯陀舍果阿那舍果阿羅漢果乃至失於生天之樂况涅槃道但能修集破法罪業與破戒法者而共從事是人成就不淨身業不

淨口業不淨意業不淨持戒身死之後入於  
惡趣云何惡趣惡趣名爲地獄畜生餓鬼阿  
修羅道復有惡道如阿由勒蟲婆伽羅目呿  
蟲浮彌修遮迦蟲修脂目迦蟲是人多生此  
諸蟲中舍利弗是人隨惡知識若生人中父  
母生離死亡喪失親里衰惱國土破壞生八  
難中捨八樂處多欲怒癡常好調戲輕躁  
無羞言語散亂不能攝心癡如白羊爲貪  
欲瞋恚愚癡所壞聾瘂盲瞎手脚攣躄值惡  
知識生無佛處若值佛世目不喜見不喜聞

萬六

四

法不與佛衆而共和合起是惡業惡人共生  
樂下劣法於正見中生邪見想於邪見中生  
正見想是名下欲下忍下慧舍利弗下慧之  
人終不能爲馱離滅道涅槃生心舍利弗遇  
惡知識而得如是諸衰惱患有是相貌是人  
聞是諸深經法驚疑怖畏如墮深坑則墮大  
罪深坑壑中何以故舍利弗如經中說破戒  
比丘有大重罪何因緣故名爲破戒破所受  
戒難可教語行無常准多所違逆常行貪著  
多雜糅行貪瞋癡行樂諸雜語名爲破戒復

有樂多事務樂多諷誦樂多睡眠所言不順  
無有次第說不清淨貪著我人壽者命者是  
故名爲弊惡比丘不知節量不知沙門法不  
知婆羅門法樂行醫術販賣求利樂爲國使  
汙染諸家樂與白衣給使作務以諸樹葉華  
果奉上好爲白衣說外道法心常捨離出世  
間法未滿二十受具足戒受戒事中有諸不  
具形體缺少不應於法受生米穀錢帛金銀  
不順教誨拒逆師命不自知身不知他人不  
能分別貴賤差品好喜妄語貪著惑取行事

散亂心不專一面有瞋相慳貪不信不識恩  
義多懷貪欲睡眠調戲疑悔瞋恨覆藏罪惡  
好自專執嫉妬諂曲無有慙愧自大放逸憍  
慢我慢大慢邪慢好行欺誑讚美其身多作  
方便開利養門陵踐白衣爲現親厚因勢得  
財以誇衆人毀破戒品定慧解脫品解脫知  
見品於佛法衆心不定信不信業報貴於現  
利謂無後世多諸疑悔志性淺弱常好驚怖  
舍利弗是名弊惡比丘如是癡人於我法中  
便是屎尿臭穢不淨是人成就身口意惡命

不清淨故命終之後墮在惡道入大地獄如是比丘諸佛如來及弟子衆常所遠離餘好道者求滅度者亦皆不近舍利弗譬如栴檀置不淨器同於不淨不復任用如是舍利弗若在家出家親近是人習効所行亦破戒品不久同惡顏色毀悴破失威儀命終之後生大地獄中舍利弗如是惡人諸佛如來及弟子衆并餘求道好滅度者皆所遠離舍利弗譬如栴檀置不淨器不復任用如是舍利弗若在家出家雖以塗身猶雜不淨舍利弗此惡

比丘亦復如是雖坐衆中著聖法服然是比丘惡相猶現梵行比丘見此不淨遠而不近而見他遠離心則瞋恨以是因緣死入地獄舍利弗是名破戒比丘六憂惱箭必墮地獄復次舍利弗破戒比丘聞佛所說如是等經萬六心不清淨歡喜信樂自知有過便疑此經爲我等說不爲餘人何以故如我等比丘有此事故舍利弗如是上妙無比之法破戒比丘乃生瞋恨於說法者心多不信得聞如是佛所說經違逆不受而作是語此非佛說教語

餘人何以故破戒比丘不樂修道修道比丘不逆佛語此皆破戒愚癡惡法謂心不信違逆佛語如是比丘自知有過但生瞋恨憍慢恨戾惡邪慢心謗佛法僧舍利弗隨此比丘聞是諸經違逆不信心不通達無上菩提教語諸人非佛所說舍利弗佛說是人則為謗法以謗法故為非沙門非釋種子應當滅擯是等比丘若干百千萬億諸佛三輪示現不能令悟使得道果何以故舍利弗如是惡人於此法中自作障道無復生分無有信心但

好衣食貪樂世利我說此人必墮地獄舍利弗我今明了告汝若人違逆如是法寶於好生處永無有分但生惡處常盲無目舍利弗是諸比丘憍慢熾盛不能定說破滅正法其餘衆人不能自活為利養故隨破我法舍利弗如是法寶爾時壞滅何以故如是法寶一切諸佛皆共恭敬諸辟支佛阿羅漢等亦皆恭敬破戒比丘增上慢者不定說法諸比丘等爾時皆共輕慢我法而共遠離多懷慳貪專求生業貴於財利嫉妬所縛常好諍訟互

第七

七

生怨隙不相敬順無有威儀志性輕躁猶如  
獼猴轉易威儀行諸惡業違沙門法遠離賢  
聖舍利弗如是惡人覆藏瑕疵多欲多求以  
財自活惡魔知心爲作方便令其乖異各共  
散壞一味僧寶分爲五部既有五部則生諍  
訟互相是非論說過失舍利弗如今比丘互  
相教化互相恭敬同心共行隨順佛語爾時  
比丘不相教化不相恭敬見作惡者畏而捨  
去不能以法互相教誨或時雖有多聞深智  
猶懷憍慢輕賤餘人各以所是自立其論不

喜相見況能受教舍利弗如來在世三寶一  
味我滅度後分爲五部舍利弗惡魔於今猶  
尚隱身佐助調達破我法僧如來大智現在  
世故弊魔不能成其大惡當來之世惡魔變  
身作沙門形入於僧中種種邪說令多衆生  
入於邪見爲說邪法謂彌樓陀羅迦婆闍事  
五分事念念滅事一切有事有我事有所得  
事爾時惡魔說如是等邪貪著事如是事者  
非諸佛及佛弟子所說爾時惡人爲魔所迷  
各執所見我是彼非舍利弗如來預見未來

世中有如是等破法事故說是深經悉斷惡魔諸所執著舍利弗當爾之時閻浮提內多是增上慢人作小善順便謂得道命終之後當墮惡趣何以故是人長夜自謂得道亦復稱說他人得道第六冒受聖人所供養事是人於諸天人世間爲大惡賊如是癡人聞說第一實義驚疑怖畏如墮深坑舍利弗有諸比丘樂此事者相與共集破壞諸佛無上菩提爾時增上慢人偏執者多惡魔又復迷惑在家出家者心令執非法說正法者少於援助則

便散壞不復得立舍利弗爾時世間年少比丘多有利根所以者何諸出家者有餘煩惱還生人中即復出家是諸比丘喜樂問難推求佛法第一實義舍利弗爾時增上慢者魔所迷惑但求活命實是凡夫自稱羅漢謂諸年少比丘等言善身口意此是佛法第一實義善護淨戒讀誦經法勤修多聞是名順忍因緣所謂淨心信佛又有第一實義汝當繫心緣中專念涅槃滅三種苦則能厭離五陰十二入十八界汝等當於靜處觀此陰界入

法悉皆無常自觀其身種種不汙汝等能如是觀當得須陀洹果又能於是五陰等法深觀無常苦空無我無有堅牢則得斯陀含轉復深觀得阿那含得阿羅漢是為第一實義是中年少比丘復問於佛法中阿羅漢果便是第一義耶我等亦知是事得阿羅漢是第一義今此五陰為憶念者生為不憶念者生答言是五陰者憶念者生不憶念者不生復問憶念與五陰為異不答言如五陰憶念亦爾復問若如五陰憶念亦爾者誰是念五陰

為六

九

者答言若無念五陰者則無涅槃實有念五陰者是故有修八直聖道入涅槃者舍利弗未來世中多有比丘成就此忍舍利弗爾時會中多諸天衆欲聞佛法第一實義聞是增上慢者所說心生疑悔如墮深坑咸作是言咄哉釋迦牟尼佛法今將速滅舍利弗中有成就善根比丘謂是比丘癡人空老增上慢者有五陰相十二入十八界相者不受此語不喜不悅從座而去舍利弗爾時諸天心大歡喜四方唱言釋迦牟尼佛猶有好弟子在

是諸人等善根不少不喜聞是不淨所說謂我見人見諸天聞此皆大歡喜稱揚讚歎是利根者喜樂難問必皆成就無生法忍如是人等合集一處共為徒侶人眾既少勢力亦弱舍利弗爾時我諸真子於父種族尚無愛語況得供養住止塔寺舍利弗汝且觀之爾時如來便為輕微我滅度後我諸子等成就善寂無所得忍時亦輕賤我以是故於無數劫摧諸怨敵化諸一切天王人王令心清淨所以爾者令我諸子得安父位舍利弗如來

今以一切世間天人為證如來如法得阿耨多羅三藐三菩提轉無上法輪沙門婆羅門若天魔梵所不能轉舍利弗如是現事如來滅後我此阿耨多羅三藐三菩提我諸弟子等欲廣流布是諸惡人不能證明亦復不能施與無畏舍利弗譬如蜜瓶置四衢道而作是言若人能食一毛頭者常不老死爾時諸天世人各以刀仗衛護是瓶時衛護者各作是言若或有人食一毛頭者我等當殺舍利弗中有一人竊作是念是瓶中蜜食一毛頭

第六

十

則不老死我今何爲惜死不噉若得噉已則  
便不畏諸衛護者亦可常得無老病死如是  
定心不惜壽命直詣瓶所諸衛護者各持刀  
仗競欲殺之舍利弗是人若能刀仗未及食  
一滴者則免衰患無復老死如是舍利弗多  
有惡人魔及魔民欲滅我法如來滅後若有  
人能隨順空法通達無礙則於諸法心無所  
得成就上忍爾時雖爲惡人所輕沮壞其道  
是人若能不惜身命勤行精進通達諸法無  
生無作則得度脫生老病死舍利弗蜜瓶是

佛第一義法諸天世人衛護瓶者則是惡人  
樂行魔事自失大利亦遮他人行實相者失  
於大利舍利弗增上慢者皆是魔黨助成魔  
事成共譏訶無生無滅法又舍利弗不淨說  
者我見人見衆生見五陰十二入十八界見  
未得謂得心計得道計得涅槃咸亦譏訶如  
是正法何以故是人貪著空故亦是魔衆魔  
所迷惑以我正法而作魔事舍利弗若在家  
出家聞是無我無人無衆生畢竟空法驚疑  
畏者當知是人受魔教化是像比丘爲是盜

法惡威儀者舍利弗是人則是我見衆生見有見無見常見斷見皆是魔民非佛弟子何以故我經中說一切世間皆空無我無我所無人無衆生無常無定無不壞法如是惡人亦復皆共讀誦是經爲他人說而心貪著我見人見如是癡人名爲造作苦因名爲反覆兩端名爲鬪亂破僧名爲汙染道法名爲沙門中濁名爲醜陋穢惡名爲但有言說名爲假僞沙門名爲沙門中貧名爲擔重擔者名爲欺誑諸佛名爲得逆罪者舍利弗是人名

爲大惡逆賊名爲惡知識名爲破戒名爲邪見名爲外道名爲無實行名爲惡伴名爲殺鬼名爲癩瘡名爲臭穢名爲燒熱名爲詭曲名爲墮在黑闇名爲入稠榛林名爲墮生死流名爲互出惡者名爲地獄名爲畜生名爲餓鬼名爲阿修羅名爲不入道者名爲欺誑人者名爲自讚已者名爲行占相者名爲大聲喚呼名爲因利求利名爲汙染他家名爲常調戲者名爲散亂心者名爲貪所害者名爲瞋所害者名爲癡所害者名爲好面欺者

名爲衰惱處者名爲無解脫者名爲憂惱縛者名爲非沙門形像沙門沙門旃陀羅沙門臭穢沙門糠糟名爲難滿名爲難養名爲壞威儀者名爲無羞恥者名爲截斷頭者名爲身體壞者名爲袈裟繫頸名爲自入闇冥者名爲多貪欲者名爲多瞋恚者名爲多愚癡者名爲五蓋纏覆名爲沒者名爲虛者空者名爲癡者舍利弗云何名空違失諸佛讚善人相故名爲空違失一切沙門功德沙門事法故名爲空云何名爲虛在聖法外故名爲

馬六

十

虛遠離空無相無願法故名爲虛舍利弗如是惡人能令魔喜貪著堅執虛妄法故同於凡夫備修是具有罪惡人相不似得法忍者沙門事法沙門功德百千萬分尚無一分舍利弗是故名爲空者虛者但深貪著世間利樂非是沙門自稱沙門不應供養而受供養名爲常賊立幢相賊名爲自在殺害人賊是人所食一口皆不清淨唯有向道得道果者能消供養是人無此是故名爲不淨食者舍利弗是故名爲空者虛者於意云何若人殺

生偷盜邪淫妄語兩舌惡口綺語貪嫉瞋恚  
 邪見是人為是常殺生不常奪命不不也世  
 尊在家殺生不常奪命殺生時少不殺時多  
 舍利弗於意云何若人偷盜偷盜時少不盜  
 時多世尊不盜時多舍利弗於意云何若人  
 邪淫邪淫時多不邪淫時多世尊不邪淫時  
 多妄語惡口兩舌綺語貪嫉瞋恚時多不瞋  
 恚時多世尊不瞋恚時多舍利弗是十不善  
 道中何者罪重世尊十不善中邪見罪重何  
 以故世尊邪見者垢常著心心不清淨舍利

篇六

十三

弗我今語汝若人一日殺百千萬億衆生一  
 日偷盜百千萬億種金銀寶物邪淫者晝夜  
 不息妄語者常欺誑人口業不淨無一實語  
 兩舌者常破和合亦助破者惡口者口常惡  
 逆乃至不說柔軟一語綺語者無有根本人  
 聞此事以餘無量語言忤亂貪嫉者於他物  
 中生非法心瞋恚者無有因緣橫起瞋恚懷  
 恨滿心邪見者樂行非道舍利弗於意云何  
 若人成就如是不善法者罪為多不甚多世  
 尊舍利弗我今語汝若人百歲成就如是十

不善罪破戒比丘一日一夜受他供養罪多於彼何以故是殺生者多人所知多人所識人所惡賤人皆知是殺奪命者罪人穢濁是深汙者不善無德人所離者又舍利弗殺生之人多奪他命或生獸心自知不是當得罪報人皆知惡無戒穢濁於此人所不望功德乃至析毛百分之一況謂福田而供養之又舍利弗是殺生之人其家妻子人皆悉知不共恭敬尚不令坐何況供養殺生之人以財自活養育妻子或時供養沙門婆羅門以此

業報得遇賢聖比丘比丘尼為說道法教離殺生捨其殺業於佛法中而得出家無有障礙得出家已近善知識得沙門果是人現世輕受罪報不障聖道得免三塗舍利弗於我法中有諸比丘非是沙門自言沙門非是梵行自言梵行斷諸善根障入涅槃迷惑失道破道因緣破諸善法行外道事入於惡道多諸怨賊空生受命猶如死人形色毀悴失正威儀於我法中名為汙染名為法賊名為逆人名為魔使猶如行廁亦如死狗如像沙門

第六

十四

同沙門服無沙門事舍利弗譬如野干在師  
子群亦如黃門在於轉輪聖王衆中亦如獼  
猴在於諸天亦復如驢在象王衆亦如盲人  
在天眼衆亦如蝙蝠在金翅鳥衆舍利弗破  
戒比丘在我衆中百千萬億諸天大衆見此  
比丘在衆而坐皆大憂惱而作是言如是惡  
人何用布薩是魔黨類欲聞無上佛道向白  
衣說復有信樂佛法諸龍鬼神等高聲大喚  
是惡比丘何故於此隱藏其身似如惡馬在  
調善馬中如是癡人自謂無有見知我惡自

藏於此欺誑天人爲是一切天人中賊衆共  
見已皆更大喚舍利弗如是罪惡比丘爲是  
諸天所知惡賊白衣無異而受供養迎逆禮  
拜合掌恭敬弊人愚癡猶如死屍所著衣服  
皆是偷得鉢中所食皆是盜取無人與者乃  
至少水亦是盜得馬六舍利弗破戒比丘所至之  
方若至東南西北方皆是偷地而行何以故  
是人所有威儀行法皆是偷盜假竊所作行  
立坐卧來去視瞻屈伸俯仰著衣持鉢今但  
略說身口意業有所施作皆是偷賊若有剽

是人髮為剃賊髮舉要言之破戒比丘有所施作皆是賊作舍利弗弊惡比丘乃至大小便利澡手皆是賊法何以故舍利弗閻浮提內皆是國王及諸大臣人民所有及眷屬非人是惡比丘於中為賊舍利弗若王大臣於惡賊所不望功德不言等我不言勝我破戒比丘著聖法服於是人所望得功德是故聽使止住國土若知其惡乃至唾地亦復不聽是故舍利弗弊惡比丘動身所作皆是賊作名為常賊大賊立幢相賊打言一切世間人

者何以故無惡不作故是故舍利弗是惡比丘於諸一切天人世間為是大賊舍利弗若人是一切天人世間大賊是人能消一飲食水不不也世尊舍利弗於意云何是人非是大惡人耶如是世尊舍利弗破戒比丘於諸一切天人世間有大惡罪以是義故我說此偈

寧敢燒石吞飲洋銅不以無戒食人信施  
舍利弗是破戒比丘無色無德無復志願身  
心熱毒喜見惡夢不樂獨處或時獨處或時

獨行身則戰懼見淨戒者僻藏避迴心性自  
媿不喜欲見受供養時驚疑怖畏心常馳騁  
多所想念深貪財利愛樂美食如是比丘命  
終之後必入地獄舍利弗是名破戒比丘七  
憂惱箭必墮地獄復次舍利弗破戒比丘樂  
在衆鬧散亂多語性好嫉妬與破戒者以爲  
親友常樂論說破戒惡事以爲喜樂不知羞  
恥違逆深經心疑不信或時聞說如是等經  
疑逆諍競不樂聽受東西顧望心不專一以  
手掩口仰視虛空從座而去謗佛法教懷瞋

恨心罵說法者以如是等過惡因緣命終之  
後深入地獄舍利弗是名破戒比丘八憂惱  
箭必墮地獄復次舍利弗破戒比丘但樂尊  
重和尚阿闍黎讚其功德以求名利稱持戒  
者因以自活執事便附隨宜善巧無有羞恥  
猶如黑烏爲僧因緣多求衣服飲食滋口身  
力肥盛不知慙愧言無次第手脚羸燥顏色  
毀悴樂視婦人不附男子如是惡人衆所輕  
賤天龍鬼神所不稱讚乃至諸佛亦不歎說  
心性急促常好瞋恚衆僧斷事依爲勢乃舍

利弗如是破戒比丘多於衆中求有威勢未問而答常求他過見淨戒者謂是欺誑勤求道者不同其法喜樂別異諍者助喜舍利弗是名破戒比丘九憂惱箭必墮地獄復次舍利弗破戒比丘好樂他事任持其理有鬪諍處以爲喜樂衣服嚴身學他威儀第  
六求好卧具利養安身樂人稱讚護惜檀越及恪住處恐好比丘來見我過憎持戒者親附破戒常讚布施不讚持戒忍辱精進禪定智慧不讚寂滅遠離獨處常好譏論持戒者過亦不稱讚

行頭陀者或指說其事或惡口橫加或憶想妄說依恃種姓數問親族以少因緣爲貪說法常以曲心而懷驚疑衆所憎惡久而益賤於持戒者常好譏說苦切實語者不欲親近意不喜聞如是等經好持讚誦如是經者聞說是經心歡喜者亦不喜見又不喜聞讚持戒法說是等經不來聽受設來聽受不久即還多與白衣而作知識常樂論說持戒比丘以得自在輕行暴惡舍利弗是爲破戒比丘十憂惱箭必墮惡道舍利弗我滅度後如是



佛藏經卷第三

第七

姚秦三藏法師鳩摩羅什譯

淨法品第六

佛告舍利弗昔迦葉佛預記我言釋迦牟尼  
佛多受供養故法當疾滅舍利弗我法實以  
多供養故後當疾滅舍利弗譬如貧人得大  
寶藏心則大樂如是舍利弗未來世中多有  
比丘親近白衣受其供養漸相狎習而與執  
事心便歡喜以為悅樂猶如貧人得大寶藏  
如是癡人貴於世利世樂奴僕若見比丘多

人供養心便謂之得阿羅漢見少從知識便  
謂惡人如是比丘為利養故捨無上正覺隨  
所樂者即成其事舍利弗如來於今為是癡  
人說如是等經何以故破戒比丘聞說是經  
則生悔心當還持戒不作大賊受他供養舍  
利弗若有比丘得聞是經心不清淨不喜不  
樂是則名為弊惡比丘何以故舍利弗淨戒  
比丘無法不樂若說布施若說持戒若說忍  
辱若說精進若說禪定若說智慧若說如是  
默畏經法心皆喜樂舍利弗有三種人聞說

是經心則憂悔何等為三一者破戒比丘二者增上慢人三者不淨說法復有三種人聞如是經心則憂惱何等為三一者人見二者命見三者我見舍利弗我今明了告汝如好善知識以慈愍心為人求利求樂求安隱汝等一心聽受我語常求善利心勿放逸舍利弗不淨說法者有五過失何等為五一者自言盡知佛法二者說佛經時出諸經中相違過失三者於諸法中心疑不信四者自以所知非他經法五者以利養故為人說法舍利

弗如是說者我說此人當墮地獄不至涅槃復次舍利弗說法比丘處在大眾信樂法者為敷高座捨佛正法而說外道嚴飾文辭我久勤苦求是法寶而此惡人捨置不說但以經中相違語義互相是非不順正法於聖法中高心自大隨意而說馬七為求利養舍利弗若比丘說法雜外道義有善比丘勤求道者應從座去何以故舍利弗有信白衣敷置高座不應演說外道諸義若不去者非善比丘亦復不名隨佛教者舍利弗說法甚難如是說

者我說此人名為外道尼犍弟子非佛弟子  
是說法者命終之後當生尼犍子道何等是  
尼犍子道邪見是尼犍子道何等為邪見謂  
是地獄畜生餓鬼何以故舍利弗身未證法  
而在高座身自不知而教人者法墮地獄舍  
利弗如是因緣如來悉知我諸弟子以種種  
門種種因緣種種諸見滅我正法舍利弗若  
有衆生聞如是經第一義空無所有法心歡  
喜者當知是人真我弟子舍利弗過去世有  
五百盲人行於道路到一大城飢渴乏極令

一盲人在外守物餘者入城乞索飲食未久  
之間有一誑人至守物者所語言咄人何以  
獨住答言我有多伴入城乞食誑人語言汝  
為知不彼問大施衣食瓔珞華香雜物隨意  
可得汝若須者將汝詣彼答言可爾誑人將  
盲小離本處盡奪其物諸盲乞食得已而還  
誑人復語諸盲人言汝等得值大會施不答  
言不值誑人語言汝等所得物可置於此我  
將汝等詣大施會諸盲盡共留物一處隨誑  
人去誑人盡將五百盲人臨大深坑而語之

言此地平好有大施會汝等各可迴面東行受大施物即便一時墮坑而死舍利弗當來比丘好讀外經當說法時莊校文辭令衆歡樂惡魔爾時助惑衆人障礙善法若有貪著音聲語言巧飾文辭若復有人好讀外道經者魔皆迷惑令心安隱若有比丘修佛法者今生疑惑咸使衆人不復供養或有比丘若二若三已讀佛經便使今求外道經法先看者讚言善好是諸人等爲魔所惑覆障慧眼深貪利養看諸外書猶如群盲爲誑所欺

皆使令墮深坑而死舍利弗諸生盲人即是比丘捨佛無上道求外道經書誑人是惡魔深坑是邪道舍利弗如群盲人捨所得物欲詣大施而墮深坑我諸弟子亦復如是捨麤糲衣食而逐大施求好供養以世利故失大智慧而墮深坑阿鼻地獄復次舍利弗不淨說法者不知如來隨宜意趣自不善解而爲他說是人現世得五過失餘人不知唯得天眼比丘及諸天所知何等爲五一說法時心懷怖畏恐人難我二內懷憂怖而外爲他說三

是凡夫無有真智四所說不淨但有言辭五  
言無次第處處抄撮是故在衆心懷恐怖如  
是凡夫無有智慧心無決定但以僞慢微小  
因緣求於名聞疑悔在心而爲他說是人長  
夜自受貪欲瞋恚愚癡毒箭何以故舍利弗  
是人不能定知諸法而爲他說心不喜樂或  
若違失舍利弗我知不淨說法有此過咎不  
得正道是事一切比丘不知諸天不知唯我  
乃知復有不淨說法比丘不解如來隨宜所  
說而爲他人說諸經中無我無人無衆生無

壽命而是人自以論辭說言有我有人有衆  
生有壽命即爲謗佛謗法謗僧謗三寶罪諸  
天世人所不能知唯佛乃知舍利弗是人亦  
名不淨說法我知其過諸神通者及諸天衆  
皆不能知唯佛乃知舍利弗我今爲汝譬喻  
解說若人不知佛道義相而爲他人不淨說  
法此人成就幾不善事舍利弗於意云何閻  
浮提衆生寧爲多不甚多世尊舍利弗若有  
惡人盡奪其命是人得罪寧爲多不甚多世  
尊如是癡人不知佛道而爲他人不淨說法

罪多於此何以故是人<sup>五</sup>不淨說法破無上佛道亦謗過去未來今佛何以故舍利弗若<sup>五</sup>有過去諸佛說一切法皆畢竟空無我無人無衆生無壽者無命者舍利弗<sup>五</sup>今現在十方恒沙世界諸佛說一切法亦畢竟空無我無人無衆生無壽者無命者舍利弗是名諸佛無上之法謂一切法無有體性無所得空本性寂滅無生無滅無有性相自相皆空如來但爲斷諸憶想分

別故說而諸佛菩提無有分別舍利弗何等爲分別謂分別者我見人見衆生見壽見命見斷見常見凡夫成就是諸分別若人無有如是分別能悉了知一切法空無我無人無衆生無壽者無命者如是念時心得歡喜聞第一義空不驚不畏是人則知五陰虛妄無有真實知十二入十八界虛妄無有真實是人亦不分別涅槃不念涅槃不言我能念涅槃以法得寂滅而不分別是法所寂滅處亦不分別亦復不得舍利弗是名順忍是人於

是順忍第一義中亦不得自相舍利弗何等  
是順忍相所謂無相是順忍相舍利弗於意  
云何若人於此順忍尚不得相是人若得我  
相人相衆生相壽相命相者無有是處若人  
成就如是智慧應受供養是名佛子是名入  
不住定舍利弗是名佛法第一義門謂無憶  
想分別無此無彼而是癡人在大衆中說於  
邪見自以憶想分別教人此是佛法此是聖  
道如是癡人則爲誹謗過去未來現在諸佛  
如是癡人名惡知識不名善知識舍利弗怨

雖奪命但失一身如是癡人不淨說法千萬  
億劫爲諸衆生作大衰惱是人癡冥覆佛善  
提本心貪著還復熾盛相續不斷以貪著故  
往來五道無善逕路生死不絕是故舍利弗  
不淨說法者得罪極多亦爲衆生作惡知識  
亦謗過去未來馬七今佛舍利弗置此閻浮提衆  
生若人悉奪三千大千世界衆生命不淨說  
法罪多於此何以故是人皆破諸佛阿耨多  
羅三藐三菩提爲助魔事亦使衆生於百千  
萬世受諸衰惱但能作縛不能令解當知是

人於諸衆生爲惡知識爲是妄語於大衆中  
謗毀諸佛以是因緣墮大地獄教多衆生以  
邪見事是故名爲惡邪見者舍利弗我見人  
見衆生見者多墮邪見斷滅見者多疾得道  
何以故是易捨故是故當知是人寧自以利  
刀割舌不應衆中不淨說法

往古品第七

佛告舍利弗過去久遠無量無邊不可思議  
阿僧祇劫爾時有佛號大莊嚴如來應供正  
徧知明行足善逝世間解無上士調御丈夫

天人師佛世尊其佛壽命六十八百萬億歲  
有六十八百萬億大弟子衆其佛滅後舍利  
流布如我滅後無有異也正法住世亦五百  
歲如我滅後無有異也其佛滅後大弟子衆  
於中一日有百比丘入涅槃者二百三百四  
百五百入涅槃者一日之中或有十萬億比  
丘入涅槃者如是展轉其佛所有多知多識  
大神通衆三月之中皆入涅槃舍利弗大莊  
嚴佛正法流布多諸天人所共供養舍利弗  
大莊嚴佛及大弟子滅度之後漸多有人知

沙門法安隱快樂出家學道而不能知佛所演說甚深諸經無等空義多為惡魔之所迷惑時說法者心不決定說不清淨說有我人衆生壽命不說一切諸法空寂其佛滅度百歲之後諸弟子衆分爲五部一名普事二名苦岸三名一切有四名將去五名跋難陀舍利弗此普事比丘苦岸比丘一切有比丘將去比丘跋難陀比丘是五比丘爲大衆師其普事者知佛所說真實空義無所得法餘四比丘皆墮邪道多說有我多說有人舍利弗

普事比丘爲四部所輕無有勢力多人惡賤四惡比丘多教人衆以邪見道於佛法中不相恭敬相違逆故以滅佛法舍利弗若有人知普事比丘所說空法信受不逆我知此人曾於先世供養五千佛有六十八億那由他人已入涅槃何以故舍利弗是人於過去世諸佛所種諸善根修集無所得空法應入涅槃舍利弗是苦岸比丘一切有比丘將去比丘跋難陀比丘皆計有所得說有我人衆生壽命徒衆熾盛是四惡人多令在家出家住

於邪見捨第一義無所有畢竟空法貪樂外  
道尼捷子論舍利弗是四惡人所有在家出  
家弟子常相隨逐乃至法盡舍利弗是中有  
人知非法事受以為法勤心行之猶尚不得  
順忍況得須陀洹果是人猶尚不作消供養  
事何況能生順忍寫七舍利弗爾時在家出家弟  
子多隨惡道不至善道是諸惡人滅佛正法  
亦與多人大衰惱事又是惡人命終之後當  
墮阿鼻地獄仰卧九百萬億歲伏卧九百萬  
億歲左脇卧九百萬億歲右脇卧九百萬億

歲於熱鐵上燒然焦爛是中退死更生炙地  
獄大炙地獄活地獄黑繩地獄皆如上歲數  
受諸苦惱於黑繩地獄死還生阿鼻大地獄  
中舍利弗以是因緣若在家出家親近此人  
及善知識并諸檀越凡有六百四萬億人與  
此四師俱生俱死在大地獄受諸燒煮如是  
舍利弗是人所有善知識家諸檀越家弟子  
諸師隨順行者凡在其數皆生地獄舍利弗  
汝等不能知其多少唯有如來乃能知之與  
此惡人墮大地獄俱生俱死凡有六十四百

萬億人如是展轉一劫受苦大劫將燒故在  
地獄何以故舍利弗破諸如來阿耨多羅三  
藐三菩提其罪甚重不爲輕也大劫若燒是  
四惡人及六百四萬億人從此阿鼻大地獄  
中轉生他方在大地獄何以故舍利弗重罪  
具足其報不少在於他方無數百千萬億那  
由他歲受大苦惱世界還生是四罪人及六  
百四萬億那由他人并及餘人罪未畢竟於  
彼命終還生此間大地獄中舍利弗是四罪  
人及六百四萬億衆生久久雖免地獄苦惱

萬七

九

得生人中於五百世從生而盲然後得值一  
切明佛如來應供正徧知明行足善逝世間  
解無上士調御丈夫天人師佛世尊舍利弗  
一切明佛聲聞弟子一億那由他爾時人民  
身長三百九十六肘時佛身一倍常光圓照  
十萬億由旬舍利弗是人於一切明佛法中  
出家十萬億歲勤行精進如救頭然不得順  
忍況得道果何以故舍利弗起破阿耨多羅  
三藐三菩提罪業因緣法應當爾命終之後  
還生阿鼻大地獄中以先起重不善業緣舍

利弗是諸人等如是展轉乃至我今於其中  
間得值九十九億佛於諸佛所不得順忍何  
以故佛說深經是人不信破壞違逆謗毀賢  
聖持戒比丘出其過惡起破法業因緣法當  
應爾舍利弗汝且觀之誹謗聖人不信聖語  
受是無量無邊苦惱不得解脫舍利弗有諸  
衆生起破法罪業違逆不信者其數無量於  
九十九億佛所阿僧祇劫乃至無一人入涅  
槃者舍利弗誰能破諸佛教不信違逆但凡  
夫愚癡及增上慢諸惡比丘并諸不淨說法

比丘何以故舍利弗是三種人不名行者不  
名得者是人不信如來法故毀謗違逆舍利  
弗汝謂何者是苦岸比丘不淨說法者即調  
達癡人是汝謂何者是一切有比丘不淨說  
法者即拘迦離比丘是舍利弗汝謂何者是  
將去比丘不淨說法者即迦毗羅比丘是汝  
謂何者是跋難陀比丘不淨說法者即裸形  
沙門婆利摩陀是舍利弗汝謂爾時清淨如  
實說諸佛菩提利益無量衆生者即是富樓  
那彌多羅尼子所說清淨諸隨學者得值五

千佛有六十八億那由他人皆已滅度舍利弗若人實語何者為是最上法師決了法義清淨說法當說富樓那彌多羅尼子是舍利弗富樓那定心決了所說無難無有所疑而生論議舍利弗若人實語何者是一切因緣法師當說富樓那是舍利弗富樓那世所生常為衆生而作佛事於九十億諸佛法中常作法師清淨說法皆於諸佛所盡其形壽常修梵行清淨說法舍利弗富樓那亦於七佛法中而作法師亦於我法中作大法師成

阿羅漢心得解脫若人實說何人世世供養諸佛種諸善根當說富樓那是舍利弗富樓那於九十億諸佛法中勤心求學決定議論有深智慧是故如來於諸法師說為第一舍利弗若我一日一夜馬七稱說富樓那功德不盡若過一日一夜亦復不盡何以故富樓那法十一施無俗因緣不貪利養富樓那法師得四無礙智唯除如來諸世界中言辭義理無能勝者舍利弗我今告汝若人欲得阿耨多羅三藐三菩提為人說法則得無量無邊福德亦

能利益無量衆生舍利弗若人破壞違逆不  
言是法者則起無量重罪因緣何以故舍利  
弗惡有惡報善有善報我以此故今以是經  
囑累於汝當爲四衆廣說分明舍利弗若聞  
是經心信歡喜即得無量無邊福德若聞不  
信心不喜樂即得無量無邊重罪舍利弗當  
知是人名爲破戒比丘若增上慢不淨說法  
者舍利弗若人違逆如是經者世世所生常  
盲無目舍利弗我今明了告汝我今所說非  
如陶師愛護坏器我今分明廣爲四衆說第

一義畢竟空法堅固者在不堅固者破何以  
故舍利弗佛得阿耨多羅三藐三菩提不爲  
邪見惡人說法不爲我見人見衆生見壽命  
見者說法何以故是諸貪著皆名邪見舍利  
弗如是我見人見不得順忍況得道果舍利  
弗若我見人見衆生見壽命見斷見常見者  
能得順忍能得道果無有是處是故舍利弗  
若人成就如是見者於我法中我則不聽受  
諸供養是非行者亦非得者但於我法求自  
活命舍利弗我說外道欲入佛法應試四月

何以故諸外道人多有我見人見衆生見壽命見斷見常見舍利弗我諸弟子無有我見人見衆生見壽命見斷見常見我諸弟子但說空無相無願無所得忍說識無所住舍利弗若有成就如是忍者我聽是人出家受戒第七得受供養衣服飲食卧具醫藥若人無是忍者應先試之先教令住諸法無我舍利弗若於此忍心不歡喜聞說第一義空驚疑譏呵聞說我見心則歡喜當知是人為魔所使若先外道舍利弗智者於此不應生憂但於此

人應生悲心何以故舍利弗若人成就如是惡者所獲惡報說不可盡當於此人生利益心教以諸法無我諸法空寂諸法無作無有受者是人若愛佛法得聞是事心喜樂者其餘空行比丘無所得者皆應示教利喜安慰其心為說諸法無所有空若聞驚畏應於衆中語其和尚阿闍黎如經中說行空行者有能了知諸法別相我與為師不與我見人見顛倒邪見貪著持戒者為師如來聽許具正見者而共布薩不聽破戒邪見之人破威儀

者而共布薩長老弟子聞說空寂無所有法  
心不信樂志在外道佛不聽與外道布薩是  
人若當不捨是見不應聽使得入僧事亦不  
受其欲如是作已猶故不捨當知是人不得  
在道便是永棄應語其和尚阿闍黎不應復

馬七

十三

畜舍利弗若僧如是則供養我亦為善破外  
道邪見是名清淨說戒布薩舍利弗我今明  
了告汝若人受是我見人見衆生見有無見  
是人<sub>不</sub>名供養於我不名隨我出家受戒是  
名隨逐六師出家以六師為師舍利弗若人

於是清淨實法不能得忍而受供養是人所  
得則為邪受舍利弗是人雖於我法中出家  
護持淨戒而於第一義空無所得法心不信  
解驚怖疑悔當知是人但貴持戒多聞禪定  
舍利弗是人<sub>不</sub>名供養恭敬尊重於我何以  
故舍利弗無始世來無有衆生不得四禪若  
但知得四禪謂為沙門利者是人何名供養  
於我是故舍利弗我今明了告汝當來世人  
於我法中種種貪著種種邪見毀壞我法舍  
利弗若人但貴持戒多聞禪定當知是人<sub>不</sub>

能淨行沙門諸法我則不說此人名為沙門  
婆羅門舍利弗若人於一切法無我如實知  
見無我一切法本來無所有空能如實知無  
所有空是則不以持戒為上多聞為上禪定  
為上何以故舍利弗諸法實相無生無起於  
中無法可為上者舍利弗是諸法如實中無  
持戒者無破戒者何況貪著而以為上舍利  
弗是名諸佛阿耨多羅三藐三菩提謂一切  
法無相自相空無我無人若有是忍是名行  
者是名得者是人名為以信出家應受供養

清淨布薩是人則為人中之天舍利弗諸佛  
阿耨多羅三藐三菩提唯是一義所謂離也  
何等為離離諸欲諸見欲者即是無明見者  
即是憶念何以故一切諸法憶念為本所有  
念相即為是見見即是邪舍利弗善法中見  
我亦說之名為邪見何以故舍利弗離欲寂  
滅中無法無非法無善無惡是事皆空遠離  
諸結一切憶念是故名離舍利弗無上道中  
諸欲永息何等諸欲謂邪不善念若我若我  
所作相事相是名阿耨多羅三藐三菩提中

諸欲永息

淨見品第八

佛告舍利弗我念過世求阿耨多羅三藐三菩提值三十億佛皆號釋迦牟尼我時皆作轉輪聖王盡形供養及諸弟子衣服飲食卧具醫藥為求阿耨多羅三藐三菩提而是諸佛不記我言汝於來世當得作佛何以故以我有所得故舍利弗我念過世得值八千佛皆號定光我時皆作轉輪聖王盡形供養及諸弟子衣服飲食卧具醫藥為求阿耨多羅

三藐三菩提而是諸佛皆不記我汝於來世當得作佛何以故以我有所得故舍利弗我念過世值六萬佛皆號光明我時皆作轉輪聖王盡形供養及諸弟子衣服飲食卧具醫藥為求阿耨多羅三藐三菩提而是諸佛亦不記我汝於來世當得作佛何以故以我有所得故舍利弗我念過世值三億佛皆號弗沙我時皆作轉輪聖王四事供養皆不記我有所得故舍利弗我念過世得值萬八千佛皆號山王劫名上八我皆於此萬八千佛所

萬七

十五

剃髮法衣修習阿耨多羅三藐三菩提皆不  
記我以有所得故舍利弗我念過世得值五  
百佛皆號華上我時皆作轉輪聖王悉以一  
切供養諸佛及諸弟子皆不記我以有所得  
故舍利弗我念過世得值五百佛皆號威德  
我悉供養皆不記我以有所得故舍利弗我  
念過世得值三千佛皆號憍陳如我時皆作  
轉輪聖王悉以一切供具供養諸佛皆不記  
我以有所得故舍利弗我念過世值九千佛  
皆號迦葉我以四事供養諸佛及弟子衆皆

不記我以有所得故舍利弗我念過去於萬  
劫中無有佛出爾時初五百劫有九萬辟支  
佛我盡形壽悉皆供養衣服飲食卧具醫藥  
尊重讚歎次五百劫復以四事供養八萬四  
千億諸辟支佛尊重讚歎舍利弗過是千劫  
已無復辟支佛我時閻浮提死生梵世中作  
大梵王如是展轉五百劫中常生梵世作大  
梵王不生閻浮提過是五百劫已下生閻浮  
提治化閻浮提命終生四天王天於中命終  
生忉利天作釋提桓因如是展轉滿五百劫

生閻浮提滿五百劫生於梵世作大梵王舍利弗我於九千劫中但生閻浮提九千劫中但生天上劫盡燒時生光音天世界成已還生梵世九千劫中都不生人中舍利弗是九千劫無有諸佛辟支佛多諸衆生墮在惡道

萬七

十六

億比丘於九萬歲爲求阿耨多羅三藐三菩提是普守佛亦不記我汝於來世當得作佛何以故我於爾時不能通達諸法實相貪著計我有所得見舍利弗於是劫中有百佛出名號各異我時皆作轉輪聖王盡形供養及諸弟子爲求阿耨多羅三藐三菩提而是諸佛亦不記我汝於來世當得作佛以有所得故舍利弗我念過世第七百阿僧祇劫中得值千佛皆號閻浮檀我盡形壽四事供養亦不記我以有所得故舍利弗我念過世亦於

第七百阿僧祇劫中得值六百二十萬諸佛  
皆號見一切義我時皆作轉輪聖王以一切  
樂具盡形供養及諸弟子亦不記我以有所  
得故舍利弗我念過世亦於第七百阿僧祇  
劫中得值八十四佛皆號帝相我時皆作轉  
輪聖王以一切樂具盡形供養及諸弟子亦  
不記我以有所得故舍利弗我念過世亦於  
第七百阿僧祇劫中得值十五佛皆號日明  
我時皆作轉輪聖王以一切樂具盡形供養  
及諸弟子亦不記我以有所得故舍利弗我

第七

十七

念過世亦於第七百阿僧祇劫中得值六十  
二佛皆號善寂我時皆作轉輪聖王以一切  
樂具盡形供養亦不記我以有所得故如是  
展轉乃至見錠光佛乃得無生忍即記我言  
汝於來世過阿僧祇劫當得作佛號釋迦牟  
尼如來應供正徧知明行足善逝世間解無  
上士調御丈夫天人師佛世尊舍利弗我念  
過世有十二億轉輪聖王皆字頂生又舍利  
弗我念過世有三十億轉輪聖王皆名摩訶  
刪摩陀那舍利弗我念過世曾見四十億轉

輪聖王皆字摩訶提婆舍利弗我念過世有一億轉輪聖王皆字億螺舍利弗我念過世有一萬轉輪聖王皆字稱尾舍利弗我念過世有一萬轉輪聖王皆字照明舍利弗我念過世有二萬轉輪聖王名字各異舍利弗我念過世有十六億轉輪聖王名字各異是諸王等我於餘處爲阿難說舍利弗於意云何汝謂是諸王者豈異人乎即我身是舍利弗我念過去時世有佛號曰善明彌勒菩薩時作轉輪聖王字曰照明初發阿耨多羅三藐

三菩提心於時衆生壽八萬四千歲其善明佛三會說法初會九十六億人一時得道第二大會九十四億人一時得道第三大會九十二億人一時得道時王見佛三會說法度人無量心大歡喜即於萬歲一切供養佛及弟子發心求阿耨多羅三藐三菩提於未來世衆生易度我當成佛壽命限量比丘僧數圍繞如是舍利弗我知是事過此無量舍利弗彌勒發心四十劫已我乃發心無勝佛所初種善根我於千歲一切樂具供養是佛五

第七

十八

百張氎而以奉上是佛滅後起七寶塔高一  
由旬縱廣半由旬皆以金銀瑠璃玻璃磲磔  
碼磔赤真珠所成心常發願衆生苦惱無救  
度者遭值惡法多墮惡趣我於爾時當成佛  
道舍利弗汝且觀之阿耨多羅三藐三菩提  
甚難修習舍利弗我修習阿耨多羅三藐三  
菩提無央數世受諸苦惱我若說者汝聞愁  
悶我諸所受勤苦憂惱皆為求阿耨多羅三  
藐三菩提舍利弗汝觀薩和檀菩薩求善法  
菩薩常悲菩薩不放逸菩薩常精進菩薩供

養若干諸佛受諸苦惱猶尚難得阿耨多羅  
三藐三菩提何況是諸癡人乃無一念為求  
涅槃舍利弗如是行者猶尚甚難況不行者  
是故舍利弗我今明了告汝以下法者不得  
上法用上法者乃得上法何等下法謂身惡  
業口惡業意惡業下法名為不能勤心修習  
善法下法名為懈怠懶惰破所受戒舍利弗  
是名下中下者又下中下者於我法中出家  
生有所得見我見人見衆生見何以故舍利  
弗如來於此了了見知有所得者乃無順忍

况得道果舍利弗若有所得者百千萬億諸佛以三輪示現是人若當不捨是見尚不消人一口飲食况得道果舍利弗我見人見得涅槃者一切凡夫皆應滅度何以故我見人見皆是邪見諸凡夫人多貪著我我所見人見衆生見是故一切凡夫應得涅槃舍利弗若人作念有我有人是人若當不捨是見得入涅槃一切凡夫應得聖道何以故一切凡夫皆是我見人見是故我見人見入涅槃者一切凡夫皆入聖道於聖道中則無所少舍

舍利弗若人作念有我見者則有涅槃是人即是聖道不須餘念何以故一切凡夫我見人見無所少故如是癡人有是過失謂諸凡夫皆入聖道聖道無繫是人修時應當殺生受諸五欲起五逆罪是故癡人於聖道中有五逆罪何以故一切凡夫皆說有我有人衆生故若人作如是言成就五逆罪者不入涅槃說我人者得入涅槃即是妄語亦是謗佛於我法中又不能得清淨出家舍利弗我今明了告汝有所得者無有涅槃有所得者若有涅槃

槃是則諸佛不出於世一切凡夫皆入涅槃  
何以故一切凡夫皆有我見人見皆有所得  
皆是邪見舍利弗汝且觀我幾時成就有所  
得見非賢聖行諸佛不與我授記言汝於來  
世當得作佛舍利弗我如是行猶不得記况  
是癡人但以持戒多聞禪定等生我見人見  
衆生見舍利弗我說此人不名行者不名得  
者何以故舍利弗長夜貪著如是邪見不得  
滅度故如是癡人不作是念我等何不試行  
修習無我人法我等或得斷衆苦聚舍利弗

萬七

二十

譬如從生盲人走避惡狗墮深大坑舍利弗  
我謂癡人如是修習我見人見有所得見以  
是諸見欲望清淨是人隨所貪著即以是事  
欲得涅槃我說是人當墮惡道舍利弗譬如  
盲人於深大坑生安隱心如是癡人於我人  
見有所得見生安隱心是人長夜隨所著者  
爲之欺誑還著是事於我法中而受供養如  
是癡人長夜衰惱墮惡道中舍利弗譬如大  
灌頂王自於所治國中威勢自在是人應奪  
是人應驅若諸民衆不順王意說王過惡沮

壞人心不能護城謀欲反叛王知是人為是大賊於大眾中打惡聲鼓苦治其罪驅擯令出以其不能盡忠護城得是苦惱舍利弗佛亦如是於無量劫修習阿耨多羅三藐三菩提為大法王於法國土有大威力諸弟子中有知法味乃至失命不毀我教諸天世人無能壞者所受教中自不惡逆亦不教他我於象中有大威力自在立教為護法城不使惡賊毀壞得入竊受如來所說密法向諸怨賊邪見者說舍利弗如來現在善護法城四大

弟子智慧深遠令我法城不懼破壞若與法城作障礙者為是大賊毀壞法城盜我密法向外道說是人常來至於我所我與共語示其教法不說密要是人為求所示教法出家受戒我知此人後應得道聽使出家四月中試何以故為護法城故又使未來世賊不更起故如是如來善護法城使不得便所謂令受佛教捨本惡邪諸比丘眾皆應歡喜聽使出家得受戒已天人世間不能轉動舍利弗何等是可試者謂外道人及樂外道法者舍

利弗何等是樂外道法所謂有所得者我見人見者衆生見者貪著邪者於自相空法中心生疑者受行種種邪虛妄法不能入於第一義空行諸邪道其人名爲樂外道法舍利弗不可試以種種色衣若白衣人若著袈裟有如是不善有所得見皆名外道於我法中出家受戒是人應試何以故有所得者於我法中即是邪見是名大賊一切世間天人中賊是名一切世間怨家諸佛大賊舍利弗是邪見人我則不聽出家受戒舍利弗一切法

無我若人於中不能生忍一切法空無我無人無衆生無壽命不能信解於我法中所受供養名爲不淨是人則是不供養佛不供養法不供養僧強入我法形是沙門心是外道爲盜法人舍利弗於未來世當有比丘不修身不修戒不修心不修慧是人輕笑如來所說如來所行如來常於第一義空恭敬供養常樂是行是諸比丘輕笑如來所行真際畢竟空法舍利弗爾時若有苦行比丘亦共輕笑令我弟子有行空者我讚其善安慰其心

第七

廿二

爾時是人輕笑行空但求不牢堅事以有我  
及有諸法如是等事令衆心喜若說一切諸  
法空者亦輕是人何以故舍利弗法應爾也  
衆生善根欲斷本相則現真實妙法在於世  
間無有受者譬如癡人以栴檀香同於猥木  
舍利弗迦葉佛說未來世中釋迦牟尼佛諸  
弟子衆以利養故爲諸白衣說第一義空爾  
時多有在家出家愚癡不受違逆不信而反  
誹謗失於大利以是因緣當墮惡道舍利弗  
爾時多有相違諍論我論人論衆生論壽者

論命者論善法欲少但樂利養實是愚癡自  
謂有智互相違逆常共諍說樂有斷事生怨  
嫉心是人捨沙門法但求利養多樂事務所  
營非一常樂伺求他人長短自隱其過稱說  
功德如今比丘覆藏功德自出過惡當爾之  
時咸共不能護持重戒無所曉故破於義利  
而言諸法空自相空何所能作如那羅戲人  
種種變現無所知者見之大笑何以故不解  
戲法其術隱故生希有心驚怪大笑如是舍  
利弗爾時真實比丘說空寂法求活命者咸

共嗤笑何以故是人不知佛法義故聞說空  
法驚疑怖畏舍利弗汝觀此人於安隱處生  
衰惱心於衰惱處生安隱心是人顛倒逆行  
善法順行惡法舍利弗如是癡人多懷慳貪  
瞋恚愚癡具行三不善根舍利弗我為利益  
持戒比丘故說二百五十戒經如是癡人乃  
以世間小因緣故向在家者說乃至書寫以  
示白衣舍利弗如是癡人說言諸法空自相  
空何所能作何以故如是癡人尚不能除慳  
貪煩惱何況能斷無明舍利弗爾時持律比

丘不能善學諸說法者亦不善學讚修多羅  
者亦不善學舍利弗云何名為持律比丘不  
能善學如來經中說有三學善戒學善心學  
善慧學是人於三學中不能善學但以多聞  
因緣輕慢他人是人則為障礙善法如是癡  
人猶尚不能如法答問況於畢竟空無所有  
中能發精進舍利弗爾時破戒比丘樂為白  
衣執事宣通使命療治病法以自生活舍利  
弗汝今觀此惡人於我法中出家受戒得受  
供養而反以我為怨舍利弗爾時四天王釋

提桓因大梵天王乃至百千萬億諸天見我法中如是毀壞皆大憂愁啼泣涕零舍利弗是實不應依止於我而為白衣營執事務何以故釋迦牟尼佛弟子乃至諸天龍神猶尚不應為作給使諸天龍神於我弟子與作給使如是癡人所親近第七白衣若能修習通達諸法十四第一義空無有是處舍利弗爾時破戒比丘乃至為得大杯酒故與諸白表演說佛法於意云何多貪恚癡多樂讀經貪外經利行不清淨是人能得信解無所有畢竟空法能

得具足沙門果不不也世尊舍利弗若有比丘趣得衣服飲食卧具醫藥持戒清淨不樂憤鬧散亂語言不貪外義晝夜精勤如救頭然一心勤行八直聖道是人於空無所得法尚難通達况是癡人無有深欲無有信解舍利弗汝觀是人不知如來無上義故破我正法自為己身及為他人作大衰惱如是大賊世間怨家此經中說應當遠離是人於佛尚不知恩自念我等所為出家於此法中不應行處則不應行是故舍利弗如來欲使未來

世中止此惡故說如是經若有比丘破所受  
 戒毀破威儀及破正見得聞是經怖畏反戒  
 何以故破戒之人不應於彈指頃住聖人相  
 在袈裟中若聞是經心歡喜者是人名為供  
 養諸佛守護佛道何以故舍利弗是名佛道  
 第七  
 第五  
 實際善男子善女人欲得沙門法者為聽是  
 經應過百千萬億由旬何以故諸佛如來久  
 乃出世雖出於世時乃說之

佛藏經卷第三

永樂北藏

佛藏經

音釋

坏沍陶器也 錠徒徑切 蠲音顯舊切 憤開古  
 對女敬切 心亂也 不也 也也

第七七册

永樂北藏

佛藏經

第七七册

佛藏經卷第四

篤八

姚秦三藏法師鳩摩羅什譯

了戒品第九

佛告舍利弗有三種人聞說是經心不喜樂何等為三一者破戒比丘二者增上慢人三者不淨說法及貪著我者是人遠離於此隨順實相深經具足充滿生盲部黨是故舍利弗我以是經重囑累汝所以者何是經於如來滅後能令清淨持戒比丘心生喜樂如是深經清淨戒者常所攝持毀破戒者常所違

離所以者何癡人聞說真實正語則以為苦舍利弗破戒比丘所成相貌如來於此已具廣說舍利弗破戒比丘法應不樂持戒律儀愚癡之人不喜智慧慳人不欲聞說布施增上慢人者不欲聞此無憍慢法若聞驚畏如墮深坑好世利者貪著美味聞呵咎食心則憂惱若人好讀外道經書者則於其中生堅實想貪著語者樂說散亂樂說嚴飾辭巧美說者於佛第一義則無淨心又於此法不敬不信舍利弗譬如不男之人無男子用至男

子中生不男想而作是念是諸人等如我無異如是好看外道書者常樂嚴飾巧美文辭於佛第一義心不恭敬舍利弗其中有人說清淨經於此人所亦不恭敬輕慢清淨持戒比丘何以故舍利弗外道經書無真實語法應憍慢貢高自大何以故是事不為獸離不為寂滅不為得道不為涅槃是人毀壞信等根故於一切處不信有功德如不男人於諸人中皆謂如已舍利弗如生盲人不見諸色所謂黑色白色不見黑白色者不見好色不

見醜色不見青黃赤白紅紫縹色不見長短麤細深淺等色不見日月星宿不見日月星宿者如是盲人便作是念無黑白色無見黑白色者無好無醜色無青黃紫縹長短麤細深淺日月星宿色無見日月星宿者餘人皆亦如我盲人心倒於一切處皆為黑闇舍利弗破戒比丘增上慢人隨外道論比丘亦復如是於深佛法心不信樂不能通達聞諸法空無所有不信不樂不能通達舍利弗如是諸人畏於汝等入邪際中不得正法以是正

第八

二

法名為真實沙門汝所得法是人不信猶如盲人謂無黑白等色舍利弗是人如是入於邪際求外道論樂衆鬧語增長煩惱惡性惡法是人不能信諸法空何況通達舍利弗於意云何野干作師子為能已吼今吼當吼作師子行今行當行已行不不也世尊何以故野干色力音聲不及師子野干但能作野干聲若欲作聲但有野干聲出非師子聲如是舍利弗破戒比丘增上慢比丘自以此事為上不淨說法者受尼犍子論若執一事堅持

不捨貪貴世利樂讀經書不能通曉諸法實相若能信受無相法者無有是處舍利弗若有比丘耆年有德比丘中龍有深智慧是人能信無所有自相空法無我無人法何以故是人<sub>第八</sub>不樂衆鬧雜語不樂讀經睡眠多事不為白衣營執事務不為使命持送文書不行醫術不讀醫方不為販賣不樂論說世間語言但樂欲說出世間語是人能信一切法空於一切法不起不壞是人則能證真實實際則能如實正師子吼非野干吼舍利弗若有比

丘著外經義是人為捨微妙佛法誦持外道  
語言為大衆說但作野干吼舍利弗如是惡  
人名為朽壞沙門何以故是外道義非佛法  
故舍利弗著外道法比丘不應自稱是佛弟  
子何以故沙門釋子不說尼捷子語於大衆  
中但說佛語舍利弗若人著不淨語欲作師  
子吼但作野干鳴是人不能解佛法第一義  
舍利弗我今明了告汝若人具足持戒禪定  
智慧不慳不貪不滌恚癡不懷諂曲有獸惡  
心言必真實常樂獨處不樂睡眠樂空無相

無願無生無滅行生離欲心求解佛法第一  
義不好世語樂出世語盡持諸戒一切惡事  
及惡知識悉皆遠離住如是法則能解空無  
所有法何以故舍利弗是行名為大人所行  
非是貪樂利養所行非是愚癡常人所行非  
是敗壞沙門所行非是糠糟沙門所行非是  
假名沙門所行舍利弗諸法實相畢竟空寂  
即是佛道好世財利貪說不淨法者所不能  
及舍利弗是地名為大智者地非是貪樂外  
道者地非是說我見人見者地舍利弗若實

有我有人者說我人者應有實相如實應問  
若有我者爲是何色青黃赤白爲在身中爲  
在身外爲徧在身如油在麻舍利弗麻中有  
油可出可示若我在內說有我者應說應示  
如從麻中出油示油第一義中求我不可得  
是故當知若說有我人者是人猶尚無沙門  
戒况沙門地舍利弗當知如是邪貪著者所  
謂著我著衆生著壽命者則爲墮頂是人如  
是邪貪著故尚不能除貪利養心况細煩惱  
舍利弗通達空者若爲貪欲瞋恚愚癡利養

所覆無有是處亦不墮頂舍利弗計我心者  
謂有壽命壽命因緣故則爲利養所牽障礙  
於道舍利弗我見者人見者雖於我法出家  
爲道如是癡人於清淨法中則非出家何以  
故尼犍子出家皆計我心有所得故舍利弗  
有所得者從無始世常有此見若得出家猶  
有不絕是名因外道出家不名因聖法出家  
何以故弊人不能信樂大法於清淨大法無  
有真實相舍利弗如是破法重罪因緣餘殃  
未盡不能信解諸法實相起大苦業或謗八

直聖道或於淨戒比丘而生惡心妄出其過  
或言破戒破見破命破威儀或不見他過妄  
生是非或以濁慧嫉心說他惡名或不能知  
佛經義理謂非佛法如是惡人成就破法惡  
業於佛第一義中心不通達不入不善如是  
重罪餘報因緣五雖勤精進猶尚不能取所緣  
相何況繫心能得道果又深依止我見人見  
如是見者乃至諸佛猶亦不能拔其根本何  
况聲聞舍利弗若人有如是貪著不善邪見  
謂我見人見衆生見壽者見命者見又於第

一義空驚疑畏者當知是人先世成就破法  
罪緣舍利弗若人如是貪著惡邪不善謂貪  
我貪人貪壽命者是人雖百千億諸佛以三  
輪示現不能令悟使得道果舍利弗寧以利  
刀割舌不應不見他事妄說其過破戒破見  
破命破威儀舍利弗於未來世當有比丘善  
護二百五十戒是人懈慢心生而作是念我  
是持戒餘人不爾輕於他人心無恭敬我是  
多聞彼非多聞舍利弗爾時多有比丘但貴  
持戒多行阿蘭若行善護戒品亦隨所說行

勤心讀經求通佛法如是人等生多聞慢阿  
練若慢而好瞋恚心常垢濁深懷慳貪瞋恚  
毒心頑鈍無知以小因緣而起大事是人瞋  
恚覆心互相出過謂破戒破見破命破威儀  
舍利弗如是僧中有好比丘心無偏黨處在  
中間而亦謂之在彼惡中互相譏論諍訟不  
息不得安隱坐禪讀經在家出家皆亦擾動  
如是舍利弗爾時多有比丘一歲二歲三歲  
乃至九歲輕慢上座無有恭敬是人出家受  
戒多不如法習効和尚阿闍黎亦無恭敬舍

舍利弗爾時年少比丘及先出家無有依止共  
相輕慢十歲比丘所畜徒眾其諸徒眾皆無  
恭敬威儀法則亦不如法舍利弗時諸惡人  
具足貪欲瞋恚愚癡互相輕慢無有恭敬相  
違逆故我法則滅舍利弗時諸癡人多起破  
法罪業起此罪已當墮地獄舍利弗我今明  
了告汝求自利已善比丘當爾之時不應入  
眾乃至一宿唯除阿羅漢煩惱已斷及病比  
丘於中有緣何以故舍利弗當爾時人貪欲  
瞋恚愚癡毒盛不活怖畏常所逼切求利善

人當應自處山林空靜乃至畢命如野獸死  
舍利弗我今明了告汝我此真法不久住世  
何以故衆生福德善根已盡濁世在近求自  
利已善比丘應生如是厭心我當云何見法  
破亂見此沙門惡世難時我當勤心精進早  
得道果舍利弗我法無諸難事不乏衣食卧  
具醫藥汝等但當勤行佛道莫貴世間財利  
供養舍利弗汝今善聽我當語汝若有一心  
行道比丘千億天神皆共同心以諸樂具欲  
共供養舍利弗諸人供養坐禪比丘不及天

神是故舍利弗汝勿憂念不得自供養佛真  
教化當隨順行莫以第一義空出入過惡何  
以故舍利弗大險難者所謂得空或有比丘  
因以我法出家受戒於此法中勤行精進雖  
諸天神諸人不念但能一心勤行道者終亦  
不念衣食所須所以者何如來福藏無量難  
蓋舍利弗如來滅後白毫相中百千億分其  
中一分供養舍利及諸弟子舍利弗設使一  
切世間人皆共出家隨順法行於白毫相百  
千億分不盡其一舍利弗如來如是無量福

德若諸比丘所得飲食及所須物趣得皆足  
舍利弗是諸比丘應如是念不應於所須物  
行諸邪命惡法舍利弗若納衣比丘於糞掃  
中拾取弊故應生是心以此障寒及修聖道  
我今以此弊故縫作僧伽黎著勤行精進若  
以凡夫乃至一夜不應著此是比丘淨洗縫  
著若此比丘於此納衣生貪著意即應捨之  
我不聽著何況餘衣何以故舍利弗是比丘  
於此衣中生非比丘法是比丘不復應著何  
況餘物舍利弗時是比丘寧以赤熱鐵鏢自

纏其身不應著此納衣何以故於此衣中染  
愛心故舍利弗納衣比丘應作是念著此納  
衣以遮寒熱以助修道我今不復更著餘衣  
當得須陀洹果斯陀含果阿那含果阿羅漢  
果舍利弗如是納衣比丘專求道者我則聽  
著舍利弗乞食比丘應諸法中無所分別常  
攝其心不令散亂而入聚落以諸禪定而自  
莊嚴乞食得已心無染汙持所得食從聚落  
出在淨水邊可修道處置食一面洗脚而坐  
以食著前應生厭離想不淨想屎尿想臭爛

想變吐想塗瘡想厭惡想子肉想臭果想沉重想又於身中應生死想青想脹想爛壞想舍利弗比丘應生如是想以無貪著心然後乃食但以支身除飢渴病令得修道應作是念我食此食破先苦惱不生後苦心得快樂調適無患身體輕便行步安隱第八又念食此食已我應當得須陀洹果斯陀舍果阿那舍果阿羅漢果無生法忍舍利弗比丘如是食者我聽乞食舍利弗若乞食比丘於所得食生貪味心以為甘美而作是念我食此食當得

好色氣力充盛不作是念我食此食勤行聖道如是比丘我乃不聽受一飲水何況飲食舍利弗若於食中不見過惡不見出道而便食者寧自以手割股肉噉何以故我聽行者得者受他供養不聽餘人舍利弗云何名為行者若有比丘決定發心我於今世斷諸結使當入無餘涅槃修習聖道如救頭然又當除斷不善惡法是名行者又能一心信解空無相無願為得須陀洹果斯陀舍果阿那舍果阿羅漢果斷諸煩惱名為行者求諸善法

常行諮問名爲行者又能發心度脫一切名  
爲行者勤心修習諸助道法於諸法中如說  
而行及有一心求佛道者舍利弗於佛法中  
是名行者何謂得者謂得須陀洹脫三惡道  
名爲得者斯陀舍阿那舍阿羅漢斷諸煩惱  
求道已息所作已辦善學三學是名得者我  
聽是人得受供養是人若受供養是名善受  
供養舍利弗清淨持戒者開化檀越者及修  
多聞讀誦經者謂請修多羅祇夜授記經伽  
陀優陀那尼陀那如是諸經本生經方廣經

未曾有經阿波陀那論議經是人久能清淨  
持戒無有瑕疵不垢不濁自在不著智者所  
讚能自具足隨順禪定常樂坐禪如是比丘  
我亦聽受供養舍利弗身證法者無有疑悔  
我聽是人高座說法雖是凡夫清淨持戒心  
不貪著外道經義一心勤求沙門上果不貪  
利養善巧定說多聞廣喻猶如大海乃至失  
命猶不妄語不樂諍訟自利利他唯說清淨  
第一實義所說如是亦如是行舍利弗如是  
說者我聽說法如來所說能使諸法不相違

逆謂說戒定慧解脫解脫知見舍利弗求利  
比丘為佛出家而破戒品何用說法何以故  
舍利弗我經中說若人自不善寂自不能護  
能令他人善寂自護無有是處如人自没汙  
泥欲出他人無有是處若人能自善寂能自  
護能出汙泥欲出他人則有是處是故舍利  
弗我今明了告汝誹謗如來其罪不輕實語  
比丘應聽說法非妄語者持戒比丘則能法  
施舍利弗高座說法決定斷疑最是上事若  
持戒不淨著外道義我則不聽及妄語者貴

世樂者求利養者樂諍訟者我則不聽我聽  
淨持戒者質直心者通達諸法實相者高座  
說法舍利弗破戒比丘寧當捨戒不著聖人  
相袈裟覆藏罪垢密作眾惡受人信施舍利  
弗云何以小因緣而於久遠受地獄身

囑累品第十

為八

十

爾時阿難白佛言世尊當爾世時諸比丘等  
於善法中云何精進佛告阿難且置莫問所  
以者何佛無量智所說經典爾時比丘尚不  
能信况能勤行阿難如來於有為法中所有

智慧一切辟支佛阿羅漢等不能得解知阿  
難如來所知法若為汝說汝則迷悶何況是  
人當能信之如來於今說如是經爾時癡人  
猶尚不信何況能行所說罪報阿難法應爾  
自身是惡謂餘亦惡如今第一懈怠比丘爾  
時第一精進比丘所不能及若所持戒威儀  
智慧不得相比如來若說此人所行一切過  
惡轉身所受是人不信更起重罪汝等若聞  
亦得憂怖不能量其所受罪惡阿難如來深  
法受者難有於意云何好牀茵褥豚子樂不

不也世尊阿難我阿耨多羅三藐三菩提此  
法深妙智者所樂是人不能信解通達得出  
家已自稱沙門不能堪受如實教化於此法  
中不能修心不得滋味振手而去墮在惡道  
猶如豚子捨好牀褥何以故阿難是我阿耨  
多羅三藐三菩提馬八甚深清淨非難化者所能十一  
信解難降伏者無智慧者難滿者難養者破  
戒者難與語者住邪法者行邪行者貴財利  
者以衣食為上者破威儀者破戒德者墮頂  
者弊惡者懈怠者小欲者小精進者無羞者

耐羞者忽忽營事業者沙門中旃陀羅沙門  
中白衣沙門中敗壞沙門中行邪道者非沙  
門自言是沙門者魔所吞者與外道義合者  
不如說行者樂衆鬧者樂散亂語者具有魔  
事者魔衰惱者煩惱熾盛者我見者人見者  
衆生見者顛倒者於我此法若能信解通達  
無有是處何以故阿難我阿耨多羅三藐三  
菩提清淨快樂與此惡人不相稱可阿難譬  
如百千億三千大千世界中間曠遠此弊惡  
人遠沙門法猶尚如是况除煩惱得涅槃阿

難如此事者說不可盡當來沙門弊惡鄙賤  
深懷慳貪深懷瞋恚深懷不信三毒熾盛心  
行麤穢難可制御阿難譬如良田善熟以火  
自燒甘膳美食而自著毒舍宅所有以火自  
焚爲應爾不不也世尊阿難如是未來世癡  
人因以我法得受供養而不信解如來功德  
又不能信如是等經不能堪忍如實說過自  
知瘡疣而逆我語如是癡人依佛自活而逆  
是法阿難爾時閻浮提內如是癡人充滿其  
中阿難且置何用求此愚癡惡人徒生徒老

所行惡事爾時阿難白佛言世尊當何名此  
經云何奉持佛告阿難此經名為佛藏亦名  
發起精進亦名降伏破戒亦名選擇諸法當  
奉持之阿難若人誦持是經所得功德無量  
無邊所以者何破戒比丘尚不能信讀誦教  
人况於是中得歡喜心何以故阿難譬如惡  
賊於王大臣不敢自現盜他物者不自言賊  
如是阿難破戒比丘成就非沙門法尚不自  
言是惡况能向餘人說自言罪人阿難如是  
經者破戒比丘隨得聞時能自降伏則有慙

第八

十二

愧持戒比丘得自增長說是經時無數諸天  
於諸法中得法眼淨惡魔及諸眷屬皆大憂  
惱如墮十六種火坑大啼哭言瞿曇沙門知  
我覺我我常長夜願佛滅後破持戒者助破  
戒者欲令諸惡比丘不知佛法但知讀誦我  
欲於佛法中破安隱心語言此非佛法無有  
義趣瞿曇於今在諸天人大眾之中守護是  
法遮我所願魔說此已心懷憂惱忽然不現  
爾時世尊欲明了此事而說偈言  
我所說諸法 隨順第一義 有為不堅牢

如夢之所見	我今說此法	呵責未來事
隨順第一義	防制諸惡人	爾時惡世中
比丘心擾動	諍訟生是非	不能得涅槃
沙門及白衣	所說無有異	爾時我此法
與俗法無別	為諸在家說	汝知我希有
我得於佛法	<sup>第八</sup> 初道第一果	<sup>十三</sup> 更有比丘言
我說不異是	此人與我同	我真見法者
見法不見者	為致白衣故	各於自法中
而生其議論	有言一切有	有言一切空
不住於正道	性惡毀我法	汝勿近是人

可來親附我	為汝說真法	如我疾得道
如是諸音聲	流布於遠近	同心相黨助
破我所教法	譬如諸惡賊	同惡共為侶
返逆破國土	城邑及聚落	爾時諸比丘
難可得開化	鈍根深貪著	小智依我人
不解於如來	隨宜所說法	說有漏增上
自言是得道	在於大會中	多有諸比丘
皆言有智慧	求智無一人	若是大會中
或有一比丘	如實有智慧	皆呵言無智
諸天神等見	法王道散壞	咸皆懷憂惱

相對而啼泣	中有諸樹神	從樹而墮地
咸言釋師子	妙法今悉壞	佛寶法僧寶
在世猶未久	如何以今日	悉皆當散壞
我等不復聞	如來所說法	癡愚無所知
上道今將滅	爾時諸地神	皆出大音聲
如來大法炬	於今當滅盡	諸天諸神等
後莫有所悔	而言不見聞	佛道今已滅
如來無量劫	自利亦利人	忍受諸苦惱
發願得成佛	釋師子大聖	度諸衆生者
清淨微妙法	今將欲滅盡	癡惡諸賊等

於今當得力	無有慈愍心	互相謗毀惱
魔使及魔民	鈍根難開化	諂曲懈怠心
瞋恚壞佛法	但以空林中	坐禪滿三月
自言是羅漢	無禪况得道	不得言得道
死言入涅槃	衆人信起塔	而自入地獄
如是癡空者	互共相輕恚	我於無量劫
所得今盡壞	爾時虛空神	共見釋師子
沙法毀壞信	發聲皆啼泣	四天王聞此
皆共懷憂惱	時與諸天神	僉皆共來下
阿羅迦槃城	夜叉神衆來	僉皆大啼哭

萬八

十四

出可畏音聲	有諸七寶城	嚴飾極微妙
失色皆如土	諸天不樂住	悲號大啼哭
處處皆來集	各共懷憂惱	相見不能言
宛轉卧在地	發如是音聲	共行閻浮提
見是大怖畏	佛子自閻諍	破壞而分散
皆從天上來	共詣我生處	天神諸寶城
七日無光色	各共坐啼哭	滿七日不起
如何大精進	勇猛世間尊	我等見住此
今當不復見	咸共詣祇洹	相對而啼哭
佛此說四諦	我等此中聞	世間將盲冥

互相輕恚慢	但起諸惡業	還墮於惡道
諸天妙宮殿	可惜今將空	我等諸天神
無復救度者	爾時閻浮提	毀壞無威色
經行處樹下	山窟無善人	一切諸世間
悉皆大擾動	諸天及大神	音聲可怖畏
爾時忉利天	舉手大悲哭	各於宮殿中
發聲而呼喚	諸天宮殿中	皆稱說我言
永離大聖王	為我說法者	忉利天六月
不食修陀食	不聽妓樂音	憂愁如喪子
諸阿修羅衆	聞有如此事	皆共相命集

欲攻忉利天	時諸閻浮王	皆共相征罰
諸天阿修羅	亦皆共戰鬥	爾時諸比丘
及諸比丘尼	多隨惡道中	少有得免者
破戒諸白衣	隨順諸比丘	以是因緣故
皆趣於惡道	諸惡優婆夷	隨順惡師故
亦復入惡道	世間皆擾動	有入城聚落
有至山林中	東西懷憂惱	以損其壽命
爾時多惡賊	多有諸險道	種五穀不生
若生蟲所食	爾時世人民	饑饉多餓死
死墮餓鬼中	久受諸苦惱	時人施佛物

塔及四方僧	輒皆共分食	我後僧如是
阿難汝等當	勉力勤精進	莫見後末世
如是衆惡事	一切諸凡夫	愚癡無有智
起諸凡夫業	疾隨惡道中	汝等勤讀誦
是名智慧因	若為智慧護	疾得至勝處
我學世正見	汝亦如我學	斷世障礙事
疾得至勝處	勤行八聖道	當疾得涅槃
思量求自利	我所說如是	是劫過去後
六十劫無佛	尚無佛音聲	况有得道者
時世諸人民	饑餓所逼切	無有孝慈心

食母食兒肉	時諸家生子	常護恐他食
誰聞是惡事	復起生死業	諸苦癡為本
五欲貪為本	若不樂五欲	當斷諸貪著
受福果報時	深生貪著心	貪著因緣故
起惡墮惡道	無漏法空寂	世間無牢固
若知如是者	汝等應疾行	無心生心想
而自大驚畏	我為作不作	是事為云何
如是諸凡夫	思惟而籌量	我當云何作
如是常啼哭	無陰生陰想	無我生我想
聞自相空法	如是亦迷悶	不知佛如實

所說諸陰義	聞則以為定	畏處無畏想
我說去來今	諸陰皆空寂	三世悉平等
猶若如虛空	所有過去佛	亦說自相空
未來世諸佛	亦說自相空	我今出於世
亦說一切法	自性自相空	三世無有異
當來人不知	佛所說實義	貪著我眾生
當墮三惡道	當來世如是	大惡甚可畏
汝等勤精進	莫見是惡世	
佛說此經已	長老舍利弗及諸比丘眾一切	
世間天人大眾聞佛所說皆大歡喜信受佛		

語

佛藏經卷第四

第八

音釋

縹音普沼切帛青白色也 鏐音葉股 解果五切 噉徒澁切 豚  
徒孫切 獷古猛切

十七

永樂北藏

佛藏經

第七七册